

四庫全書

集部

欽定四庫全書

香溪集卷十六

宋 范浚 撰

記

慎獨齋記

養正齋記

拙懶軒記

不欺堂記

自牧齋記

西溪觀魚記

慎獨齋記

人藏其心至難測也飾冠衽巧進趨騁辭辯誰不欲使人謂己士君子也然而卒多不免為常人至或陷于大惡者患在心違其貌而安于自欺夫人之自欺殆非一物曉然知善之可好而棄弗為是自欺曉然知不善之可惡而姑為之是自欺實無是善而貪其名是自欺實有是惡而辭以過是自欺知有是過而吝不改是自欺

實所不知而曰我知之是自欺實不知行而徒欲有聞焉是自欺色取仁而居之不疑是自欺言浮於行而言之不忤是自欺求諸人而無諸已是自欺有諸已而非諸人是自欺其餘所謂自欺之目殆未可殫言而遽數也而好欺者動欲飾詐以欺人殊不知一日之間百念紛起所自欺者實多而欺人者曾不十一又其欺人者心詭譎不惜不情則未能欺人而實先自欺也彼好欺者終以弗思而安之得為常人幸矣幾何其不陷于大

惡耶禮記曰所謂誠其意者無自欺也小人閒居為不善無所不至見君子而後厭然掩其不善而著其善人之視已如見其肺肝然則何益矣此謂誠於中形於外故君子必慎其獨也夫人有殺心輒形於聲有欲炙心輒形於色有懼心目動而言肆有異心視遠而足高其心一動雖甚微也而形於外者已不可掩如此彼小人乃欲掩其不善於君子之前當其念已不善而思掩之則不善之念已誠乎中既誠乎中則心有自匿不恤之

微情呈露于言意態度之間自以為人莫我知也而不
知人已得其所謂不可掩者如見其肺肝嗚呼自欺孰
甚焉此予之所為懼而思戒必以慎獨名居室也昔者
海上之人每旦從漚鳥游漚鳥之至者以百數其父曰
汝取漚鳥來吾玩之明日之海上漚鳥舞而不下也蓋
其有取之之心一萌於中雖不自知態度之異而漚鳥
知其異焉心之隱微禽類猶覺之而謂人不我覺可乎
是以古之學者皆知慎獨雖用心於幽闇無人之地亦

必誠其意而未嘗自欺故季札解劍繫徐君之冢樹而去曰始吾心許之矣豈以死背吾心哉夫徐君心欲劍季札心許之此誰得而知之季子乃不以徐君死背其心嗟夫世之面謾而有諾責者非自欺乎有志于慎獨者不當如季子乎樂正子春之執喪五日而不食曰吾悔之自吾母而不得吾情吾惡乎用吾情夫五日不食出於詭偽而非其情者子春其心知之誰得而知之子春乃以詭偽自訟若有莫大之悔嗟乎世之矯激盜名

者非自欺乎有志于慎獨者不當如子春乎漢第五倫
謂人曰吾兒子病一夜十往退而安寢吾子有疾雖不
省視而竟夕不眠豈可謂無私乎夫安寢而十往者倫
之詐不視子而不寢者倫之情其用心至微也誰得而
知之倫乃自以為私而顯言于人無毫髮隱焉嗟乎世
之視人以詐而終匿其情者非自欺乎有志于慎獨者
不當如倫乎宋阮長之為中書郎直省夜往鄰省誤着
屐出閣依事自列門下以闇夜人不知不受列長之固

遣送曰一生不悔闇室夫着屐既過誤又當暮夜長之
不自言誰得而知之乃以悔闇室為甚負固欲自列嗟
乎世之幸人所不睹而肆為不義者非自欺乎有志于
慎獨者不當如長之乎歷觀古之學者能慎獨不自欺
其人固亦多矣而予獨以四人稱蓋舉其有會於吾心
者將書諸座右為旦暮起處之戒庶幾於前所謂自欺
之目可以深思而力去也中庸曰君子戒慎乎其所不
覩恐懼乎其所不聞莫見乎隱莫顯乎微故君子慎其

獨也夫不睹不聞所謂獨也不睹則目無與焉不聞則耳無與焉吾所謂隱微者雖吾耳目猶不得與是獨也是不可須臾離者也故夫不睹之睹不聞之聞有莫大之聞見存乎隱微而不可以言言則慎獨之學勉而精之豈惟不自欺也哉紹興九年六月八日記

養正齋記

門銘凡戒古志士所以示微慎善自修也今人平旦出門牽事逐食營為百緒暮必歸居以休其身然方動作

疲劇昏睡寤起起則凌遽如昨彼其心事躁擾冥迷流浪曾不少自存省是知休其身不知休其心彼且視一室如傳舍出而入而出耳豈復以古人銘戒為事是大惑也盈川虞唐佐堯卿從浚游幾十朔矣顧其中淳而外謹不異一日刻意問學知以領略為務歲季謁歸且言平居定省餘暇立屋貯書以學名之曰養正義取諸易覬釋厥旨使得持歸旦暮誦服為不力不逮之警雖卧興其敢忘乎浚曰子志如是其知門銘几戒意矣

與放心不求而徒休其身者大異其可無說以遺子夫
人生而有知不學則愚愚則視不明聽不聰思不達雖
有知猶無知也既學矣不得其正則哆哆然緣目而逐
色緣耳而逐聲緣思而逐欲所以禍其主者殆有甚於
不學而愚是以君子正之為貴易曰乾道變化各正性
命曾子曰吾得正而斃焉斯已矣夫人受命於天正性
本具君子保是正性斃而後已謂天全而命之人當全
而有之生乎由是死乎由是則可以無愧於此曾子所

以終其身欲得正也且萬物散殊形生氣化未有無正性者石可破不可奪堅丹可磨不可奪赤霜雪大摯松色猶茂風雨晝晦雞鳴自如物一受其正性且不移奪人其可失正乎仲尼彖易於蒙曰蒙以養正聖功也於頤曰養正則吉夫頤咀物養道也而蒙為物穉欲得其養又蒙互體自二至上有頤象焉故聖人以養正垂戒異卦而同辭見正之不可不養養之不可不正也古之人欲見正事聞正言習正人邪室不坐邪蒿不食行容

必直立容不跛不傾聽不睇視皆所以養正而其要則
曰先正其心夫童蒙未發心一而靜自是養之雖幼而
壯壯而老將不失其赤子之心是可以為聖之功也水
未必遽至于海言水者必期于海學未必遽至于聖言
學者必本于聖蓋道無本末趨進唯諾掬溜播灑幼學
也而上達之理存焉子無謂養正為淺事其勉之哉紹
興十六年十二月一日記

拙懶軒記

古之君子其持心也厚故未嘗廣己以自多雖至聖大
賢猶將退然自託於無能之地非其詭謙飾遜而貌為
此區區也蓋不若是則不足以持盛德而守成能故曰
聰明睿智守以愚多聞博辯守以儉武力毅勇守以畏
富貴廣大守以陋後之君子則不然浮躁而淺露言華
而行伐造大而好高著一書便欲得宰相捉一筆便
欲斷大事客氣虛張過自標置至有大署其門者曰不
讀五千卷書無得入此室嗟乎一何古之君子忠厚退

遜而後之人不長者若是其相懸乎蓋嘗竊聞之矣學者之患莫大乎自足而止曰學如是是亦足矣足而不學則以為無足學也能無廣己以自多乎殊不知道之深德之奧學問之大曾非揭流涉波者所能測知譬猶遡沿上下不出于絕潢斷港則必以為天下之水止是而已因又以為天下之觀水者舉莫吾若故侈然有輕天下之心試使之浮滄江並溟渤渺瀰漫汗不見邊際彼將眩掉縮忸悵悔自失愧前所見自比於蹄涔杯坳

之不暇然則世之造大好高而過自標置者庸非不學之過也哉歐陽使君我丈人行也守臨江廉以首持寬而不苛小民便其政以病丐閒既得請來寓吾里之蕭寺闢高軒游居其間而名之曰拙懶浚觀使君耆年嗜學旦暮黃卷手之不釋而又短章大篇哦詠日富此其勤且巧至矣猶方自託於拙懶將非審所謂學問之大而內不自足且法古君子所以持盛德欲以矯世造大好高之弊乎昔嵇叔夜自謂懶不涉學而博覽淹該杜子

美自謂老大意拙而詩窮天巧崔沔名室以陋柳子厚
名堂以愚今使君自謂拙懶正嵇杜類也而以名軒又
崔柳意也當使君之在臨江也軍書方急元戎偏師鼎
來捷至改轅而弭節者交午相望凡輦車流馬資糧靡
屢革角惹秆推牛剗羊所以征須百緒而官無儲錢待
粟庫庾單匱一切仰取於民不供則乏軍興箕歛則人
告病於是而丐閒又使君所以為拙懶者歟浚既登軒
賦詩使君又屬以為記浚方鄙世俗浮薄而樂使君獨

忠厚退然自託於無能也不能無言遂書之

溫州永嘉縣不欺堂記

令之職視它官最為近民宵興具冠服坐堂上進訟者而聽其要逮日入或不得休至以燈火臨事凡詭情偽貌誣讎抵譴之說紛泊于前姦胥恣之舞文法以佐其囂加又令與賓客相對答若將逐大官行李出歸境上無虛日間省熟事則吏抱簿案袂屬以進涉筆占押至千數百牘非甚競爽不能無勞以昏昏則罔冒面謾者

益乘之令欲使人無欺其艱矣哉吾兄茂安宰永嘉既踰年惠洽禁信門庭日靜以無事致書香溪告其弟浚曰吾為令不以能聞幸吾邑多士鄉句俗無豪黠使猶竊稍食于此吾即聽事之東堂置几硯以暇隙棲息其處因名之曰不欺用自警省是非求人不是我欺惟吾心不欺而已子其為我記之浚曰吾兄撫千室如環堵治糾紛如寘掌使薨尾之吏自新雀角之獄不聞非不欺何以及此抑聞古人有言誠其意者無自欺也夫誠於

此化於彼將不令而民應之蓋有行乎令外者矣嬰兒
生三月前軒冕不知欲後斧鉞不知畏然而慈母之愛
諭焉蛟潛于淵其子迎化于高陵精微之感殆難以言
論吾兄能無自欺則宴坐虛堂如臨上官如面重客如
前民眊而後胥徒視一克念如諧羣言患一失念如耳
道謗不欺也如是則可以對越鬼神洞開金石況此民
其寧我欺乎昔人論三不欺優民不忍欺者竊嘗評之
民不忍欺謂欲欺之而不忍是猶有欲欺之之心蓋三

不欺皆求乎彼不求乎此故雖善治如宓賤民心之欺猶有萌焉彼其掣二史肘而責之書則已既欺矣能使
人無欲欺之之心乎嗟夫精誠潛通甚於呬呼欺不欺
存乎中疑若沈阻未易鉤致而諭諸人者焯焯不可掩
昔者齊侯與管仲謀伐衛退見衛姬而色動足高而氣
強衛姬知其欲伐衛也明日見管仲言徐而有慙色管
仲知其舍衛也夫齊侯匿其情密矣入則衛姬知之出
則管仲知之由是以觀人固不可欺而欲欺人者其不

可尤也況將使人無我欺又甚不可要在無自欺也審
矣吾兄厚重簡廉政先治已知心不欺不求人不我欺
是自慊之學也於以感人人將自化無萌欺于心者故
浚叙所以名堂之意併論三不欺與夫精誠之諭諸人
者以為記紹興十有六年五月一日記

自牧齋記

永豐柴詰吉卿懷鉉束書來香溪從予游與之言物理
性命之學洒然以喜其有志乎治氣養心益拳拳也既

累月告歸覲其親且曰詰不佞初不知學然亦不敢一日忘所欲學他日溫清之間結茅為齋以居名之曰自牧蓋所欲學者也願覲一言以歸書之齋壁用謹不逮是耳善誨于朝夕而門牆不遠也予應之曰子知自牧之謂乎予將廣子意而遂言之易曰卑以自牧此豈惟論文當世而已哉善學者尚友古人於千載而終與之齊用此道也世之空腹自賢者讀書未能斷句已下視服鄭殆十八九為庸人彼惟自處於庸人謂加於庸人


足矣故廣己以自高然則自高者迺所以為卑而卑以自牧者迺所以崇吾德也今夫登山者處已高矣仰而左右視則巍然崔嵬者猶在其上焉為學亦然賢如孟軻亦至矣亦且憂不如舜蓋古人之學不極乎至足不止宜其見已之卑而未見其高也子欲無為庸人乎則宜法古人用心而思企之然後可以言自牧之道夫人之生固有物焉混然天成在善養無害而已自牧之道以禮制之懼其放也戒物之感懼其誘也居之虛靜之

地欲其安也飲天和如甘泉味道腴如薦草懲忿窒欲
如去敗羣致一不二如惡多岐勉之慎之曰自牧之自
牧繁久體正而肥益力不已充實光輝且將無入而不
自得又豈復有牧之者乎能知此則自牧之學必以聖
賢為師仰大道之高邈方積跬而履卑眇已事之甚陋
敢虛張而自欺顧吾子名齋之意豈有取於斯乎子歸
矣持是說為自牧齋記紹興十六年八月二十四日記

西溪觀魚記

西溪翁曉致長魚於范子受而羹之以侑晨飢飢竟捫
腹散步于西溪之上時霜清水落風收不波潭光空明
杲日照映下見羣魚游泳殆可尾數差次隨續東西自
如范子顧而曰嘻向侑吾飢者非此溪之魚乎胡為困
于溪翁自取脂鼎禍乎魚方潛澄淵浮淺瀨隨至輒適
不知身之為水也水之為身也魚之樂亦至矣餌雖美
其鈎實鈗何乃貪一豆之羶腐遂捐清冷之適至於刳
腹流腸鬚離鬣落縻於沸釜豈與逐微名細利以失無

賢之軀者同其迷乎吾於魚有所感矣歸舍記所感將
為知幾者言之



香溪集卷十六

欽定四庫全書

集部

香溪集卷十七至十九

詳校官起居注主事臣顧崇泰

主事臣呂雲棟覆勘

覆校官中書臣汪師曾

校對官中書臣滿庭筠

謄錄監生臣王增聞

欽定四庫全書

香溪集卷十七

宋 范浚 撰

。記

衢州龍游縣學田記

三益齋記

存心齋記

訥齋記

平堂記

饒州浮梁程公生祠堂記

衢州龍游縣學田記

今天子紹開中興以至仁神武戢兵靖民億寧區夏爰
建太學風動萬方文治燭然覃布遐濶凡雄州偏郡壯
縣下邑庠校並設生員營宇務為崇盛守長佐貳闕決
學政一或不虔為不任職然以銅墨劾官者責專而事
叢不與他等自中材處之往往促束于文符朱墨敲朴
期會直鑄補短救過不給其能以養士為念信乎必文

儒而兼通世務然後能以化治稱也括蒼吳君彥周為龍丘宰既蠲民瘼乃行視黌宇問著錄幾人吏白廩米不繼士至潔腹誦經或不煖席又負笈挈挈而它前令熟視欲議未遑也令君曰嘻茲為教本予後而弗圖是不知務其何政之能為即日按取官廢田請于州以為邑之學田歲制其收可食數十士太守待制張公避其意許之於是高冠侈袂而抱方策者相與婆娑乎崇堂邃館商古今引仁義縱雄辯而極理要終歲賴安令君

為諸儒賜其厚矣哉令君以論秀登雋科為文雅健意
氣兼勝當官猶嗜學決事得小閒即取挿架書吟翫自
娛休暇對客于便坐即之退然如韋布士雖劇談終晷
不出文字間世固有沾沾者朝解褐得名第暮已氣息
拂霄漢視窮巷士如土梗矣令君從官二十年而氣習
不異書生時則胸中所存有過人者宜其注心於學宮
勤如此也某客游邑境見士大夫若市里僑舊道令君
性資剛耿清操如冰雪秩行滿矣而理邑規撫不變如

始至自經賦外一銖一粟不忍橫索以彫其民鋤姦剔
蠹吏率懲懼為脅息服粟盡箴頑暴革心掃跡益令君
文儒而通世務知以養士勸學為急故化行孔易如高
屋之建瓴水也邑士徐安節學職徐振業等相與具叙
田事本末謁請于某且曰惟我學子伊昔羣萃糗糒不
贍牽勉肄習百為勤艱不克卒業逮令君惠我諸生俾
既厥心惟問學是專修焉而安以克力久邑人咸曰休
哉我有子弟令君實飲食教誨之惟父兄人知銜荷謂

不可諼宜有金石刻丕揚茂猷願為志之以慰父兄子弟之心某應之曰紀令君實德使邑人歌詠以無忘厥休其寧可辭惟令君養士士思所以稱宜觀夫自養者自養正則令君所養正矣昔孟軻論養心為大體而賤養口腹益是心之大覆穹隆而載旁薄包八荒而函萬殊兼舉有無一物莫之能外其與天地流通陰陽冥合者曾莫見其形狀是大體也自養者善養乎此而無事於區區之小體則令君與士子兩善而咸宜記雖不文

亦得自託于不腐矧龍丘為信安支邑之劇雅稱多儒
今復漸被于美化家修人勵將有秀民魁士比肩接跡
震擢于時以光昭令君之大惠顧不偉歟令君名芑今
為左宣教郎紹興十九年夏四月壬申蘭溪范浚記

三益齋記

學未極乎至足而上雖顏子不能無進況方有志而勉
于行其汲汲於取友求益也固宜然人知得益在友
不知所以得益者實在我不在彼也昔者孔子讀易至

損益喟然而歎以為自損者必有益之自益者必有闕之學者損其自多以虛受人故能成其滿博自賢則天下之善言不得聞於耳矣予嘗論之世故有虛驕傲誕聞見未毛銖而自大如山崖者矣或指其微累必盛氣艴容辭以偽辯曰我何尤我何尤則直者將見拒彼惟許身之欺也如是又必以人為欺則諒者將見疑其自視甚侈矣如馮夷未東傲睨秋水必以天下之美為不越乎已則多聞者將見陋負是三失焉能受人善言將

不得聞於耳雖得友猶無友也故曰友者所以相有也然則直諒多聞之益豈不在我乎哉予同郡陳九言叔永有志而勉于行者也家居義烏之菱塘養親讀書以三益名齋而求記於予九言予昆孫婿且從予學久因告之曰凡益之道非能贅夫固有而增多之也惟性至大初無限量益動而異日進無彊則凡德之裕皆所固有非偽為也故易繫辭曰益長裕而不設益豈由人乎哉惟夫短於自知故友直不足於信故友諒未學寡陋

故友多聞然卒所以得益者皆自得之信乎在我不在彼也令子和厚而修謹以明已事為孜孜予期子勉夫三失而得益也用復告子以尚論古人之益蓋孔子所謂直諒多聞者古之所謂直諒多聞者也今人與居古人與稽則得益愈大孔子嘗論直躬曰吾黨之直者異於是論管仲曰豈若匹夫匹婦之為諒也論多聞曰闕疑而慎言其餘又曰擇善而從孔子所謂直諒多聞者蓋如此而又謂卜商好與賢已者處端木賜好與不已

若者處則曰商也日益賜也日損今子欲求三益友於斯世則甚難而尚論古人也又甚難皆當以孔子之說求之紹興十八年二月十日香溪范浚記

存心齋記

壽昌邵恂子信與浚舅家有世睦焉因舅氏見予香溪留學於予居其趨向甚端其植志甚篤一日告予以將歸且言家之屋南有齋焉名曰存心覲省之餘當復習業其處敢問何修而可以存心乎予應之曰善哉問也

昔者鄒軻言存心之說甚備予嘗索其指歸而知學之方試因子而妄言之夫君子之學本諸心心不在焉則視簡不見聽諷不聞此其於口耳之學猶莫之入也況窮理致知乎是以學者必先存心心存則本立本立而後可以言學蓋學者覺也覺由乎心心且不存何覺之有孟子曰人之所以異於禽獸者幾希庶民去之君子存之是心不存殆將晦昧僻違觸情從欲不能自別於物尚安所覺哉此君子所以汲汲於存心也然而人之

念慮橫生擾擾萬緒羨慕耽嗜厭惡憎嫉得喪欣戚觖
望狠忿怵迫憂懼與凡私意妄識交午叢集紛紜于中
汨亂變遷無或寧止雖魂交夢境亦且顛冥迷憤悠揚
流遁彼其方寸蕩搖如疾風振海濤浪洶湧求一息之
安且不可得則存其心者不亦難乎然心雖未嘗不動
也而有所謂至靜彼紛紜于中者浮念耳邪思耳物交
而引之耳雖百慮煩擾而所謂至靜者固自若也君子
論心必曰存亡云者心非誠亡也以操捨言之耳人能

知所以操之則心存矣心存則不物於物不物於物所以異乎物也孟子曰養心莫善於寡欲其為人也寡欲雖有不存焉者寡矣養以寡欲使不誘於外此存心之權輿也至若藏心於淵則必有事焉而勿正用能於勿忘勿助長之間默識乎所謂至靜者此存心之奧也然則存心可以已乎曰未也凡學始於存心中於盡心終於盡性惟心之盡是無心也非無心也無私心也是道心也道心惟微於是而精一之斯可以盡性矣方其存

心也猶有存之者焉非所謂盡心心未盡焉非所謂無
心未能盡心烏能盡性心未盡焉烏知所謂性孟子曰
盡其心者知其性知其性則知天矣存其心養其性所
以事天也蓋心既盡而空洞清明然後知性之為性皆
天理也然則存心者所以存天理求盡其心而已顏子
拳拳服膺存心之學也其心三月不違仁顏子之心之
存也至於屢空則嘗盡其心矣然特屢至於空而未能
常空為其不違仁之心猶存焉耳心不違仁善矣乃為

空之累此毛猶有倫之謂也揚雄曰人心其神矣乎操則存捨則亡能常操而存者其惟聖人乎雄徒知存心不知心存而未盡不足以盡性故以長操而存為聖人事聖人者寂然不動從心而不踰矩尚何有於操存哉予故曰凡學始於存心中於盡心終於盡性此非予之說也孟軻之旨也今吾子有志于存心是學之始而方求所以存之之道是存心之始子其慎所存乎傳曰差若毫釐繆以千里蓋事物莫不然而心為甚子其可不

慎哉恂聞予言作而曰取請志是說而習之予因為記
俾以歸勸之學也紹興十七年四月晦日香溪范浚記

訥齋記

凡人在孩抱未能聲其意咿嚶終日莫喻所欲乳保教
之語僅名東西則家人雜然歡笑以為早慧言於人何
尤哉惟夫尚口飾舌夸華背誕譏議訾毀速累召禍於
是有三緘之戒故曰天生人使口可以言不學其言不
若狂然則人固不能無言惟言之慎而已予兄子伯通

家居南偏有齋焉名之曰訥求予言為記予多其知慎
言也而樂告之曰華不繁者實必碩流不寫者源必豐
言之不出則積中之宏而深也固矣惟古之學者用心
於內深造自得默識神解冥思慮於道奧何暇事無益
之言哉然則君子欲訥於言不但區區口擇期無尤違
而已今伯通也慈旨甘友兄弟睦宗戚行身祇畏其於
過言亦寡矣而拳拳焉以訥為務豈非有志乎用心於
內故歟孔子嘗曰予欲無言道至於無言至矣彼曾子

之一唯蓋未免乎贅况多言乎學者欲知無言之旨當
自訥始紹興十七年夏六月晦日香溪居士范浚書

平堂記

代

法曹於州為卑官而其責為最重凡州之屬邑有大訟
舉以上府府有司師聽而成之報具而法曹當其罪當
平則執誅受杖俱無寬人一失其平則有吞恨而死者
此其為責不已重乎切嘗念刑者有成無變君子於是
乎盡心苟不用慎而濫為橫入則豈徒得罪于不可欺

之氓人將必有陰禍鬼誅雖疾走而不得逃者以災其
身而敗其家此古人所以抱具獄而哭者也漢虞經為
郡縣獄吏案法平恕嘗曰于公高門而定國至丞相吾
決獄六十年矣雖不及于公其庶幾乎子孫何必不至
九卿經後有孫升卿位果通顯升卿謂其子曰吾事君
直道行已無愧所悔為朝歌長時殺賊數百人其中何
能不有冤者自爾二十餘年家門不增一口斯獲罪于
天也嗟乎虞經用法平恕六十年僅得一孫貴耳升卿

一殺不辜遂受咎罰其久如此得不銘丹筆以為決讞
戒耶某不肖來為永嘉法叅軍恪居惕慄所以奉三尺
者惟謹念將自飭即便宇而名曰平堂且道所以名之
意後之君子不韙是名則今日修椽大屋易為馬廐車
庫奴婢室也必矣尚期有以辨予心者庶無廢於斯堂
年月姓名記

饒州浮梁程公生祠堂記

代

饒於江南為上州撫封廣遠畫疇踈曠且當兵興人力

彫剝逋畝者衆地棄不墾脫小弗稔則市人菜色越境
逐食殆為常俗紹興九年歲適甚旱粒米翔貴人不奠
處稚耄携抱流冗大去官庾單乏莫克賑贍吏視民散
無可奈何冬十有二月詔以竹左符命鎮江帥閣學程
公進職一等移鎮是邦既下車條舉荒政安集携離唄
咻撫字去者得歸居者用蘇招徠商人艫艘尾銜穀粟
芡集團貯市積衍如年登民飽以嬉破戚為歡易羸為
充惟屬邑浮梁人獲更生皆曰程公活我則相與謀繪

公像建生祠于寶積佛廬供僧祈福以報公賜某惟古
循吏至行異績若大恩既為百姓慕愛則為生立祠宇
如石相于公輩著在前史百世稱詠其遺風凜凜可想
見也然皆未若公活千里饑人使不轉溝壑以死則民
之戴德銜惠殆無終窮過石相于公遠矣某於公為門
下士承乏是邑樂與編氓均沐仁政且獲揖祠宇盛事
敢紀輿人之詠歎琢諸美石揭于祠下昭示永永洛爾
邑人過者起敬祝以眉壽毋忘公恩

香溪集卷十七

欽定四庫全書

香溪集卷十八

宋 范浚 撰

書

寄上李丞相書

寄上富樞密書

答徐提幹書

答胡英彥書

上婺守周侍郎書

荅姚令聲書

寄上李丞相書

浚聞之昔者東周之衰王道雖微然朝廷公卿大夫表著猶在列爵錫土之柄天子猶得而用之大而齊晉秦楚小而宋衛陳鄭凡得百里而臣其民者亦莫不有卿佐列位臺餽廩粟黃金白璧翹車高旌足以來天下之賢能然而一時豪傑英偉之士類皆褰裳提屨鱗集霧會爭先擁篲于孔氏之門而惟恐獨後若淵騫求由參

偃商賜之徒其才皆足以佐天子而立南面彼不之齊
之晉之秦楚宋衛陳鄭以干說其君又不從仕于周以
徼一旦之富貴顧獨甘心棲遲乎蒿廬壞室飲水噉茹
無監門之養以飽其腹被褐穿結無五兩之綸以華其
身菜色當阨困窘顛沛矢死而不悔何哉蓋士非狂惑
鄙陋則皆欲有立於時而流聲光于後世彼七十子者
有聖人為之依歸行道守義相與樂其樂而忘其窮舉
天下之富貴殆無足與易者故夫七十子之所成就皆

足以不朽上焉者窺見聖域仰高鑽堅以窮探乎性命道德之微雖魯喭之資亦皆深造自得終於易簣結纆泰然不動其心以安於死下焉者猶能取休聲垂無窮千載而下號曰孔門高第想望風采而不可及嗟乎天下之富貴曾何足以易此哉其後孟軻以仁義之說倡于戰國干戈之際而告不害公孫且萬章輩亦皆捨所謂縱橫捭闔刑名楊墨以來學乎孟氏當是時士之挾縱橫刑名干說諸侯者無不釋屣而析圭解褐而懷符

一談笑而取客卿封君之貴高門大屋開第康莊之衢
持梁甑肥心嘆意得朱輪黃屋從徒駕馭馳驅乎秦楚
齊趙燕魏之郊而不害輩獨去榮華就枯槁捨衆人之
所趨以求學乎孟氏其亦以軻為道之所在且足以託
乎不朽也嗟乎自戰國以至于今千數百載雖其間不
無豪傑英偉之士出於寒素然不幸而無聖賢為之依
歸要所成就其能如孔門高弟孟軻之徒歟然亦幸而
時有名人魁士為一時領袖者如李膺以節義顯為世

楷模被容接者有登龍之榮四方翕然莫不奮迅感激
波蕩而從之故東漢雖衰而士多忠義慷慨解衣就鼎
鑊摩頸伏刀鑽相牽連趨死而不懼是雖無益於漢之
存亡然振頽風起衰俗於卑陋委靡之餘於名教亦不
可謂無少助也唐世人物視秦漢而下為最盛蓋其始
也隋王道以儒術興於河汾學者戴經抱籍以從之遊
如房玄齡杜如晦魏徵薛收李靖溫大雅等舉出其門
而皆為王佐勲名卓然其後韓愈起文弊於垂微為諸

儒標的有從愈者號稱韓門弟子於是唐之文章鬱然
有西漢餘風學古之士肩摩跡接繼愈而作爭以所長
焜耀于時此唐世人物所以視秦漢而下為最盛實通
愈之力也往國家承平久天下無事士得沉潛學問而
又有韓富歐陽司馬二蘇諸公落落然踵起為儒先生
各以所學收率天下之士或博約其人使知所趨向或
借之清談緒論以成其名是以天下之士得所依歸益
自憊勉磨厲以德行文學政術稱者藹然輩出奮迹立

朝咸能侶侶正色以忠節直道遠猷茂業與夫高文大冊聲詩雅什為國光華蓋亦有韓富歐陽司馬二蘇諸公為之依歸而已厥今世道艱棘滄海橫流士之脫于干戈憑陵強弱噬食若戶賦口斂誅求漁奪寒饑憔悴之餘其能志氣不衰自期有立於世者蓋寡而又公卿不揖客將相不俛眉類多簡貴自尊非伊優面柔乞憐諂笑則無以辱流眜而見甄錄彼耿介尚氣者使之呼吸折節而得萬鍾且有所不為其況攝纓束衽介徒隸

而倚牆屏俯僂偵伺以幸貴人一揖一顧彼且以為殺
身不足滅恥是以浩然鵠舉惟恐足跡見汙於權門而
有志濟時強聒自任者亦且為之前卻猶豫欲依世撓
節則不能欲遺世遠引則不忍欲求所依歸則無有遑
遑乎若迷塗冥行而無適從於斯時也士非信道篤自
知明行藏自我不因人而作輟則其所成就殆未可
知也嗟乎今世之士去孔孟遠矣而曾不得如李膺
王通韓愈者為之依歸一何不幸至此極耶然於此有

說焉庶幾有以慰天下士大夫之心蓋以為閤下勲德甚高而名塞天壤士之仰英風望餘光者異一見有輕萬戶之心得一言若九鼎大呂之重誰不願遊閤下之門以自託於不朽閤下所賓接固亦多矣儻復加之意焉而略勢位躬吐握以一變近時公卿簡貴之風均禮寒素開納後來或博約其人使知所趨向或借之清談緒論以成其名將見天下之士褰裳提屨爭先奔走以閤下為依歸雖易之以富貴而彼將有所不願士非狂

惑鄙陋孰不捨衆人之所趨而委心乎閤下者閤下方
將復執大柄佐吾君撥衰戡亂則必有奮忠義立勲名
者出為朝廷用閤下貴隆槐鼎為元功宿德文章言語
與事相伴實今宗師握牘秉管者亦得以仰窺標的益
其鑽礪之工以收名於文錄是閤下與一時士大夫皆
無媿乎前修也後世且曰吾宋復有閤下為士所依歸
蓋韓富歐陽司馬二蘇之續不其休歟浚抑嘗聞侯羸
欲就魏公子之名而故久立公子車騎市中使人知公

子為長者能下士漢王生於公卿廷會時使張釋之結
韉而曰張廷尉方天下名臣吾故聊使結韉欲以重之
汲黯與大將軍抗禮或說黯大將軍尊貴誠重君不可
以不拜黯曰夫以大將軍有揖客反不重耶大將軍聞
愈賢黯故夫以貴下賤者古人以成名今人以為恥古
人以為取重今人以為辱今之士未必賤於侯嬴貴人
其能為之久立車騎市中乎今之士未必不賢於王生
貴人其能為之結韉於廷會時乎使今之士與貴人抗

禮貴人其能賢之如大將軍之賢汲黯乎必若以謂是非聖賢事為不足算則周公下白屋固有執贄而見還贄而見修禮貌而見與欲言而請畢事者越千人而不倦然則近時公卿簡貴自尊之風不及古人遠甚誠願閣下矯其失曠然大變之也方今強敵方張神州陸沉人墜塗炭骸體僵暴于原野稚耄流冗于道路聖主嘗膽九重之上卧不安席疆場日駭近以江介為守荷戈挺刃乘鄣望候之士懸命鋒鏑甲冑孕蟣虱而不得久

伸于菴廬之下義人志士傷時激烈酸鼻落涕吟嘯扼腕正聖招馳騫履遺弗取之秋公卿不於此時倒屣走迎國士傾身接納與共謀所以批患折難廣地強國尊社稷顯宗廟致主庇民之至計顧獨坐養威重留賓滿廡夷俟踞見至有盥頰賓興昧旦守門見辭關人足趨起而不得前者悲夫士固蒙恥冒詢極矣而公卿之拒人卻客亦已太甚是何足以傾天下之士哉一旦秉成當軸坐廟朝進退百官知所謂棟下有柱柱下有石石

下有土求其人而不得則坐誣一世謂之乏材如李吉甫之為相自謂後進人物罕所接識惜然莫知能否其亦簡貴自尊之過也故曰士不預備而熟講卒然君有問焉其無以應之則大臣之道或闕故不可憚煩今天子側席竦意注想閣下甚眷而搢紳君子逮于窟穴黎庶莫不引頸傾耳望閣下復相如望歲焉浚故願閣下均禮寒素而加之意益務開納以為遄歸鵠閣棟下柱石之用伏惟高明察浚之所為拳拳者皆海內公願而

當今主盟吾道之責閣下其實當之又以浚身賤遠不得走伏牆仞再拜下風以控此區區之說也而寓其誠於書進越是懼併祈閣下恕之

寄上富樞密書

浚不肖伏食蓬蔕慕仰閣下盛德願望威重有年矣屬趨行馬之扉僭納里刺屢獲侍杖屨而聆謦歛慰釋鄙心殆若所謂受教一言而七日不食如饗太牢者幸甚幸甚雖然浚固有所慕仰而非敢以求知也今閣下乃

有意欲以小人姓名塵于薦書聞命悸悚不知所為既愧淺昧不足以仰承特達知遇又切歡詠閣下大雅宏度其將以厚德鎮浮俗移澆風也浚聞公卿之大任莫若索士而士則以自鬻為醜抑嘗怪近時公卿大人不俛眉下士類多簡棄寒素莫之省錄狂生賤儒習為躁競望高門而走謁遽除戚施以期一顧一揖而終不可得是先達者未嘗求士於後進而後進者顧獨求知於先達也逆施倒置聞見稔積漸靡成俗視為當然此浚

所以閉關窮閭無足跡於通貴之門雖藿食水飲而猶
守愚抱拙不之改也閤下以耆德碩望輔天子中興厯
揚華塗入柄斗樞所以薦賢助國者不可指計今茲均
佚琳宮以接納寒素為孜孜愈益不倦士之躡履墻屏
欲瞻輝光希獎識者亦多矣而清談緒論獨見及於守
愚抱拙之小人此非將以厚德鎮浮俗移澆風故歟昔
人謂救漸靡之弊必俟乎薦紳先生德與位并者揭然
建明之閤下於今其薦紳先生德與位并者也固可以

鎮浮俗移澆風則今日蒙被盛意豈惟小人之幸將天下寒素實幸也然顧浚材智朽短有所不能為者念當仰辭嚴旨而惕焉恐懼不敢遽前謹先緘牘粗陳其愚繼將走伏鈞屏舒叙微臆以祈大君子幸察儻閣下不遺鄙賤終以浚為可教則庶幾獲偕賓客後乘時一進見于館下以幸道義之餘誨雖辱薦嘉命不克謹承於今而寒微之蹤固猶出入門下他日苟可効心畢力以報國士之知者敢不自竭伏惟閣下原其悃悞非詭辭

為解也曲賜昭亮而容允之冒瀆鈞嚴無任皇灼俟命之至不宣

答徐提幹書

浚昨者拜狀過蒙報貺華翰慰誨勤勤見所以眷知甚厚欽佩至意感何可言浚愚無知於世事都不通解竊獨有志于學嘗以為士生叔世去聖人千數百歲雖不復見聖人之儀形而即遺經所傳以求所不傳之妙尚可以見聖人之心又以為論語一書記孔門格言善行

最為本真誠使夫子復生且有喜問者進乎前而夫子
一二詔告之亦不越乎論語所記故拳拳服膺妄意窺
測聖賢旨意譬諸幽蔕窮人穿隙覩天雖或有見亦已
微矣然時時取臆說為朋友言之以求是正其失不料
輒塵聽覽且蒙曲賜推與皇愧不敢當然心知左右愛
之而欲其至於是也銘激之餘竊有感焉蓋自大學之
道不傳士狃習尚以好修取譽為極致以辭章記誦為
要務語以聖經性命道德之說能知而不嘯然陽應者

鮮矣以為是而洒然入焉者又加鮮至若可與談微究要領會於言意之表者殆得一二於千百焉是非此道之難知也由此道而知之者為難得也昔李翱在唐諸儒中言道最純然其用心勤甚而時人莫之知後世亦莫之知翱從韓愈為文章辭彩雖下愈而議論渾厚如復性書三篇貫穿羣經根極理要發明聖人微旨良多疑愈所不逮而愈但稱翱學文頗有得耳翱亦自謂與人言未有是我者是當時莫之知也近世名儒尚論古

人衆矣曾無以言道與翱者至或指復性書為中庸義
疏而曰愚者雖讀此不曉也不作可焉是後世亦莫之
知也翱之言曰有問於我我以吾之所知而傳焉遂書
于書以開誠明之源而缺絕廢棄不揚之道幾可以傳
於時翱之用心如此而當時後世舉莫之知信乎學此
道而難與人言非適今也求之前古又非特一李翱也
凡聖賢皆然惟其莫已知而力行不惑所以為聖為賢
耳浚也昧甚不知力之莫可而竊有志于學不知難與

人言而每求夫相與同乎此道者蓋不易得而僅有之也今左右於浚不待數面屢款遂知其愚貽書累紙立論精切非見道明白不及此既深歎仰又自喜相與同乎此道者今復得左右幸良厚也惟是邈遠墻序不獲時奉名理以慰勤翹之心居劇傾向謹拜書具謝蒙知之厚因有感為繁言以瀆左右悚忤惟深

荅胡英彥書

英彥足下欽耳妙譽未接姿制遠蒙書貺勤懇荷厚意

至矣雖過相推稱皇愧不敢當然以足下論學問師友之說求所用心見足下善學與我同志千里相望歡喜無喻足下引夫子問禮樂事及非韓退之皆當夫子聖人道大無我視善之在人與在己不異其下問乎人猶心口相語無分於為彼為此也豈復以禮樂之問為愧其後荅曾子問禮必曰吾聞諸老聃荅賓牟賈問樂必曰丘聞諸萇弘終不掠所聞為己有益其大也若是是宜依歸者衆如百川之宗溟渤也抑觀夫子始與賈言

及武樂虛心款叩若初未聞者雖知賈言非是猶詳問
焉已而訂賈二失且備論六成皆賈所不知蓋聖人不
以所已聞者自足而好問乃爾非以其無我故耶後世
學者小識眇然局於已有教誕虛張如蝸角自大將以
不知為知其肯下氣諮事于人乎往往髫年抱惑至華
髮墮顛而無與祛者是雖若好高而所以自處實甚陋
疑退之亦未免此病也退之固大賢欲自比孟軻然終
不至焉者患在未能克已耳軻願學孔子而乃師子思

是善學孔子者也退之則曰世無孔子不當在弟子之列豈知得師之義乎孔子學無常師大而師天地故上律天時下襲水土小而師萬物故於山樂其高於水取其有本於易之象詩之比興與所引喻凡物理之見于經者舉取之上而師古聖賢故祖述堯舜憲章文武竊比於老彭下而於人無所不師故曰三人行必有我師焉善者從不善者改由夫子觀之凡可法可鑒者皆吾師也豈必弟子云乎哉大抵古人之學不越乎窮理

之所存師之所存也取諸物理皆可為吾法能會萬物之理為已事之用非得師而何喬梓俯仰父子之師也常棣華鄂兄弟之師也鳥嚶其鳴朋友之師也羔羊跪乳有禮之師也蛾子時術進學之師也石泉潛流而清慎獨之師也勁松凌寒而秀厲操之師也蘭之馨鮑之臭善惡之師也玉之不撓蒲之可卷剛柔之師也推類言之有是物必有是理目見耳聞無非吾師況在人乎見舌而知守柔顧影而知持後於己身猶得師焉況在

人乎使退之明此義必不為前言自處於甚陋也彼且
自忘其師說所謂無貴無賤無長無少惟道之師與弟
子不必不如師之論試以韓之矛攻韓之盾則敗矣豈
其荅呂生書時方欲以高談自抗未之思耶足下能知
退之失言則自處者必有在故某雖未接姿制而遂知
足下之善學與我同志也足下家學有淵源昆仲又皆
多聞知親師而求友相與錯磨進乎此道未可涯也時
正沴寒不審起居何似無階良覲伏冀以時為器業自

重人還遞其上狀率略悚仄無已因風幸時寄聲不宣
上婺守周侍郎書

浚聞古之人闔戶高枕與被髮救闕者同道蓋君子出處初無二致用則出不用則處其處也學以為已其出也用所以為已者為人此豈二致哉自古人之學不傳士以出處為異道故凡居蓬衣白閉關屏跡者自以為無用於世莫或知之夫人不已知固守道者所不屑然公卿有位取人窮則失之吾道之不明豈不益甚矣乎

浚也至愚身處賤約自視淺陋無以偶世俗未嘗妄意
人之已知不謂閣下過聽賜之珍緘獎與問遺禮意甚
眷此人必有以浚欺閣下者顧浚詠慕賢德雖久而未
有足跡於賓序乃蒙殊知若此信閣下取人之道與世
之簡棄寒素者大異矣是用進伏於門牆願望德容以
慰區區仰止之心此非以受知門下為己私悅也以謂
閣下取人之道如此則凡幽潛遠隱之士益自信其所
守且後世之人知居蓬衣白閉關屏跡者其所守固自

有在未為君子之棄也吾道之明其庶幾乎恭惟閣下以天子從臣殿此名鎮仁行如春威行如秋民安田廬門不施吏席惠化洽矣而又增治學宮教育士類且將使浚預講說之末此實閣下力振吾道加意甚厚浚雖不獲承命然益知吾道之明繫閣下是賴則浚之蒙知豈特為已私悅乎此浚所為進見之意也

答姚令聲書

得足下去月尾書辭意良勤系念雪釋曠然以喜然寒

溫問外首及妄人假僕姓名和元祐賦鋟板散鬻若欲
僕亟圖自辯白者此足下愛之深也僕亦聞諸道路謂
偽和賦集頗已流布僕固陋甚妄人又欲以此浼巖之
是支離寢醜而更蒙不潔也然似聞所和賦無一語可
讀者審爾則不待家至人諭苟一寓目必洞其妄世言
薺芘亂人參蛇牀亂靡蕪蓋惡其似耳使偽賦誠無與
鄙文似則恐未能為我浼也其又何辯足下閱古今名
人鉅公所為書若集多矣偽妄增加者往往有之况僕

眇鄙橫被浣衿又胡足多怪唐元白詩為時人繕寫模
勒街賣於市井甚者至有盜竊姓名苟求自售雜亂間
廁無可奈何今偽賦自為一集不以僕文參之則無雜
亂間廁之患其為盜竊姓名甚易見也然傳聞失真翻
轉名實古人所歎近亦嘗白官司移文建陽破板矣前
散驚者人得之當即以供舐覆藥楮有不得其詳者足
下以是告之

香溪集卷十八

欽定四庫全書

香溪集卷十九

宋 范浚 撰

書

上潘大著書

代上范丞相書

上致政胡待制書

答羅駿夫書

與潘左司書

荅虞夢符書

與林權縣書

上潘大著書

孔孟云歿久矣義命之說不見於世故士之持心日益以偷持心以偷則屑焉以富貴為念故其居窮約則患富貴得富貴則苟富貴有苟富貴之心則必持保寵位若庸商賈之守囊橐愀然恐或亡之而弗獲有為彼其心惟恐君之不昏相之不愚而不已容也苟朝廷以

一束草置之巖廊之上被以公衮翼以徒胥命之曰相
彼亦將曰此賢相也顧非豪英偉特之士天資鞏固挺
然自拔於頽風靡俗之間灼知義命無一分富貴心者
詎能犯顏正論歷詆時相以警悟人主之聽耶邇聞閤
下進對明天子前指彈柄臣無所回隱音吐暢厲聳動
陞戟雖遭斥黜且甘心而不顧意閤下具安行義命視
富貴如泥塵者也四方持忠抱義之士聞風增氣交聲
互傳所謂豪英偉特非閤下具誰歟使薦紳君子上自

三揖下極九品盡如閭下則孔孟所謂命義之說必復
大明於今之世矣惜閭下之道其無與誰助之雖然古
之抗直情伸鯁論以劇其上者多矣言不用而見黜率
為懟然狼戾譏非刺詆述書著論以興讜諛否則自放
於丘園盃酒之間絕口不道世事以示曠達夫以言不
用而興讜諛固小丈夫之事至於絕口不道世事亦非
君子之心也君子有所謂憂國愛民之心未嘗一日忘
之也有言於君不恤其用不用也用固君子之願也如

不用特於言弗克伸耳其於憂國愛民之心亦何損哉
昔者孟軻不用於齊三宿而出晝猶以為速且曰王如
改諸則必反予又曰予雖然豈舍王哉又曰王庶幾改
之予日望之夫孟軻非重去齊也不用而猶諄諄以云
者其心不忘乎用王為善而欲以安齊民是所以為君
子之心也浚固願閣下察孟軻去齊之言以無忘君子
之心益思所以憂國愛民者今天子夙夜求治他日必
悟閣下敷奏之忠翻然起閣下而置諸左右以詢諮政

道浚知閤下之黜不久矣敢布諛語閤下其垂觀焉

代上范丞相書

某不肖獲隸幕府下亦既歲月矣惟是才朽力綿而魯于及事夙夜怵惕懼使令之不給用速譴誅為僚列羞然今猶坐曹自如而未以劾去者夫豈自以為能哉實繫相公厚德宏度包荒容愚不欲以遲鈍之失去士故某亦得覩然濫吹于羣賓衆屬之末相公之恩德不既至矣乎而某於此猶將貢瞽言于鈴下者蓋當可言之

時不得而默也士固恥於自媒淺露以求知不可之大者然當可言而不言要亦未為得也驥蔑一言而善叔向曰子若無言吾幾失子矣使古人率不用言以自見則是語也不當紀於春秋家此某所以不得而默也厥今薦舉之法至矣然猶有遺材焉何哉居上位者忽不察沉下僚者介不求焉耳漢王子師刺豫州未下車即辟荀慈明既下車又辟孔文舉此其人皆素譽暴著無事于自進而人雅知之者也非此族也而獨介介然自

同寒蟬雖王公大人樂人物負鑒裁而猶曰吾弗求吾弗求則固而已矣誰得而知之古之人固有惴惴焉惟恐不得出大賢之門下者矣至書亟上足數及門而不愧彼豈甘冒自媒之醜哉以謂仁人在上位而不一告之是果於自棄所以自進而不疑也況如某辱肩下吏旦暮走趨望拜光采進不為無因退不為自媒又焉得自疑而塞默乎方今海內騷動烽舉燧燔甲而兵者環宇縣百姓罷弊居者困督輸而行者勞轉餉喁然望治

益思息肩而未得也則所以佐明主圖中興者非公
其為誰注意具瞻將於是乎在一日環賜遽至當有天
子之命曰丞相其亟來覲遂復相予則潭潭府居若在
霄半泥塗賤士曾不得引領矯脰仰望列戟之餘光又
安能曲躬布武進瞻威重以幸一流眄乎此某所謂今
日為可言之時也夫以朝夕在門下備指呼幸亦至矣
而不獲定價于一言是某之愚不足以辱品題也人其
謂某何且將曰是固為丞相幕府吏得以職事日拜于

前者而不見知遇伯樂所以不顧將不為凡馬乎如是則某也終不復受知於人雖殞身不足以滅恥亦相公所宜甚憐也某抑聞之橫一木而棟明堂者其力固多然其下有柱柱下有石石下有土積三物而棟乃成馬相公行當還天朝任棟梁重則標鑒中人物宜柱石者信不乏矣如某瑣瑣或冀得與塊土齒為終身榮雖瞑目可以無憾小人誠願其敢望乎干冒鈞嚴進越是懼無任皇灼之劇

上致政胡待制書

浚聞之君子分定于所性外物莫之能加亦莫之能損
故未嘗標出處為二道或三仕三已而了無榮悴之心
蓋自有道者言之視千萬世猶俯仰頃豈復於百寒暑
間校用舍得喪為區區欣戚哉閣下以卓踔超世之資
早聞道於過庭淵源信有自矣所謂樂天知命無入而
不自得者閣下固已洞達而深造之用能於強年請老
屣替橐其如脫渺然引身翬埃之外非知性純徹養熟

而分定不為外物軒輊能若是乎浚竊嘗謂近世士大夫勲名塞天地忠義貫日月學窮千古文高一代者往往踵武相繼或比肩並出至於力行所知以聖賢為度輕蟬冕薄萬鍾遺榮獨往心亨於寂寞之地者蓋幾無而僅有之此浚所以夙夜願望閭下之德容為拳拳者也浚生四十有九年矣顧髮已種種而常自安於窮巷不敢妄懷求進之心夫豈以是為硜硜哉蓋斯道也廣之彌宇宙窮日月約之不出乎身古之人已事未明則

不敢以為人自任孔子嘗使漆雕開仕對曰吾斯之未
能信夫子大聖其知人也審矣將使開仕必其人有可
仕之實而開方自省乃爾豈非鉤致于已者未能窮深
極遠則不足以通天下之志故耶然而曰斯云者果何
謂哉以開所能言求其所不能言則其心必有事焉而
難以形似道也彼惟用心於內者猶不能無疑方且汲
汲於自力而何暇乎求仕是固後學所宜知而浚將終
身勉焉者孟子曰禹稷顏回同道蓋閉門造車推而之

四方轍無不合者禹稷之轍周乎天下而回則造車于陋巷者也豈異道乎夫士雖未必能為回而皆可以為回至以為己之學造車于陋巷則夫人而皆然也閤下之轍固嘗周天下矣今浚以造車之說見其亦有合否乎伏惟閤下察之不宣

荅羅駿夫書

浦陽之別俯仰五年勤企可知前日遣人以久不聞動靜輒寄意適道書中為吾友問乃辱專書垂惠愧荷之

餘慰浣多矣吾友邇來為況如何既當門戶百為勤艱
良未易處然處人所難處始見學力至與未至士當以
弘毅自期乃能任重而力行不怠居困而心亨自如今
人質既薄學且不固一落莫則大戚戚以悶苟可脫寒
餓而濟其欲者無不為也彼不知士君子所謂窮特其
人窮耳其人之天孰能窮之哉是心如太虛外物如浮
雲浮雲有去來太虛無得喪浮雲有變滅太虛未嘗動
也能明此則心廣體胖無入而不自得雖臨死生如履

坦塗况外物乎駿夫資固穎異然經事尚少鄙意誠恐駿夫習前日裕餘或不能安今日之勤艱也謹以已所固守而自強者奉勉惟古之人率困厄勞苦動心忍性而後能光明成就安知駿夫今日之勤艱不愈於前日之裕餘乎他惟以時自愛是祝

與潘左司書

遠違益誨忽幾兩月瞻仰不可名叙去十二月伏領貺書感激厚意無有窮已因念不肖且賤膚受末學本無

傳承所自喜者徒以師心謀道尚見古人自得之意不
劫劫為世俗趨慕耳執事聞道先達用所以見知者脫
畧年輩使玷交游中規約挽引欲遂納諸成就許與甚
篤有子弟之愛久愈益親每語以林泉終老示論久要
伏惟此義銘貫心骨口不能言非若俗中人感恩荷惠
喋喋推謝為也浚竊嘗怪今世貴人率以勢位自高而
窮士亦以貧賤自屈自高者恥下交為世俗之羞自屈
者竊上交為一旦之榮貴人失其德窮士失其守此道

之所以不行也道之不行亦已久矣起而振之非有當
世賢達其將誰能宜乎執事者之於浚為是眷眷也浚
誠固陋獨未嘗求知於人未嘗求知於人而辱國士之
知最厚焉伏惟此義當古人中求之乃今得逢於下執
事一何小人之幸歟伏承晉遷司都方且大用矣願調
護自重相與一二賢君子主盟吾道於上使世之窮士
如浚者相與企瞻餘光樂道而自勉於下則道之行也
其庶幾乎區區夙心感於見遇因書如此

答虞夢符書

邇便至辱墜書一函發緘疾讀始洒然慰中赧然忤卒
之釋然以喜浹惟違濶絜久馳仰勤甚忽對誨示所不
如面款者無幾故洒然慰又惟自語離後曾不克裁尺
帑為君子問頃歲夢符取名高第宜以書道欣竦多賀
之私之便因循而復不果今當引牘濡筆具答來貺負
負大難為辭故赧然忤已而三復教簡情義周密則用
自慰曰豈其念我如是而以書問不至為譴乎人之相

知貴相知心夢符其心知我矣尚我慊故釋然以喜凡
夢符與僕相知者皆非世俗之謂宜勿復縷縷云也茂
仁兄云夢符瓜戍期在秋杪夢符才高學富志行卓然
應即橫翔天衢以趨開泰之會而方將戢翮棲側偏
乎其不宜也然屈蟄所以為伸安知六月息不為南溟
圖歟不平小官固君子所以無入而不自得者也夢符
存問僕委曲甚悉佩謝厚意何時可忘僕昧陋甚與世
舛馳放跡荒野荆扉蓬屋竹樹蔽翳讀書之餘時綴小

文或微吟短歌以抒情抱雖瓶儲屢空可忘也自餘皆
不足為左右道炎暑煩溽伏惟侍次多暇神明相之尊
候萬福不宣

與林權縣書

蘭溪地雖小亦萬家邑也徵發期會奉宣詔條與鈛箎
所受訟記雜然糾紛益日不暇給官數易事益不治弊
積蠹深吏皆上下手索瘢生羽直以賕錢多寡為罪重
輕前令尹熟視袖手無可奈何要非剛健精通令明禁

信以紐梃吏奸為意固亦未易治也執事不鄙此民辱
屈臨而撫字之潔已奉公剛耿疾惡私請曲謁不得行
于戶庭決事處法務自我出不以委吏繩奸發伏有犯
無貸小胥老吏跼足縮氣慄如蹈冰此蓋執事政蹟之
懿而輿人欣詠以為幸見者也然尚有小未至者蓋由
弊事猥衆翫習積久蕩無條綱堆案相仍叢集至故
雖以高明處之亦或未暇千慮之一脫有遺智猶勤精
思夫以剴裁繁劇而小有未至固不遽為善政累然竊

譬之結綠夜光朗耀晶瑩有瑕焉若毛芒雖未累其珍
要不若無之為快也况執事區處曹務俾就程律循類
按次剖斷無壅則旁明遐矚事至畢見而無或不詳政
既即叙彼鴈鶩行者且不敢為譚語敢為銖兩奸乎退
食多餘於以便坐舒紳靜頤神觀不其休歟浚鄙陋適
有名數在部屬邇嘗納謁進勤館人曲蒙謙虛接揖禮
意甚備不以編戶民遇之是宜竭愚少佐高明之萬一
十餘年來更六七令下邑困于牾政久矣誠有以蘇息

之其為愛仰心當如何若曰吾姑攝是邑也無庸為率
職計則宜非執事之心魯叔孫所館雖一日必葺其墻
屋去之如始至當官而行有不如叔孫之館乎伏惟加
惠此民思所未至而終以無倦將見能名顯聞部使者
交書薦寵被褒擢不遠矣下邑其何幸如之

香溪集卷十九

欽定四庫全書

集部

香溪集卷

二十一
二十二

詳校官起居注主事臣顧宗泰

主事臣呂雲棟覆勘

覆校官中書臣汪師曾

校對官中書臣潘庭筠

謄錄監生臣周元曜

欽定四庫全書

香溪集卷二十

宋 范浚 撰

啟

賀中書張舍人啟

賀婺州林給事移鎮紹興啟

賀婺州吳尚書再任啟

賀鄭侍郎移鎮平江府啟

賀樓樞密啟

賀徐江州啟

代賀詹中丞啟

代賀張帥啟

代賀章察院啟

代上太守謝解啟

代謝李提刑薦舉啟

代賀富樞密啟

代賀吳尚書知婺州啟

代賀羅尚書啟

代賀趙丞相畫像啟

回許丞啟

代謝循資啟

代賀許右丞啟

代謝太守薦舉啟

代上太守啟

代邑宰醮太一青詞

附

賀中書張舍人啟

伏審祇恩宸扆直制掖垣仰宿德之登崇翕輿言之胥協
竊以綸闈近密鳳閣清華職分押于六曹任尤嚴于四禁
必妙文華國斯稱起草之工惟精識研幾乃盡判花之美
克當盛選允屬元儒恭以某官敦裕而剛方高明而肅括
偉才名世厚德鎮浮學洞古今龜千年而五總量推遠大
器百斛而半虛雅高難進之風鬱有老成之望簡在睿眷
儀于要塗譬天閣之隱篇正祠曹之缺禮立坳門下旋綴

錄于直書壓角省中遂通班于邇著居獻納論思之地掌
典謨訓誥之文豈惟使溫詔雅辭炳若同風于三代將必
有嘉猷高韵卓然獨冠于一時注意既隆秉成可待浚風
叨鑒遇遠庇庥光聆紫泥黃紙之除徒知增抃望紅藥蒼
苔之省莫遂修容伸慶有虔陳辭靡究

賀發守林給事移鎮紹興府啟

疇庸疏寵移鎮宣風惟京輔之剖疆非賢不乂冀帝城
之蒙福與國咸休眷求持橐之英誕布出綸之號發自

注意諧于僉言恭以某官學洞聖真道隆師表以至大
至剛之氣濟先知先覺之資夙簡睿衷久儀禁路邇分
重寄來殿名邦惠養編氓道有袴襦之詠誅鋤宿蠹下
無銖兩之姦一方甫藉于承流三月已觀于報政德風
追古治等冠時推名世之期至于今五百歲矣稽共理
之効其惟良二千石乎亟上最書茂膺殊渥爰陞臨于
近屏用益著于遠猷留婺境之愛棠人思卧轍想稽山
之騎竹日徯揚旌蓋二天覃布于恩仁故兩地舉同于

慕詠魏相揚州之治已被深知蕭公馮翊之除姑為詳
試既民瞻之積稔知公望之彌高浚竊庇庥光猥蒙顧
遇仰快十行之成命敢伸三賀之微悰易地班條豈獨
慶越人之安越佐王入相又將觀周旦之歸周并頌有
虔宣陳莫既

賀婺州吳尚書復職再任啟

伏審奏最劇藩被褒康之懋典叅華延閣聯近從之通
班深注眷衷悉還寵數恩庥所暨喜舞惟均恭以某官

夷粹而剛方高明而敦大德風鎮乎浮競亮節貫乎險
夷久服禁嚴蔚隆公望竹符分寄殿天子之邦葦杖化
情行古人之事至誠不言而信和氣無形而春令政報
成優恩厲勉尊臨千里復借一年兼榮晉陟于西清共
理尚煩于東道帝城并蒙福豈曰小補哉刺史入為公
方且大用矣浚仰山末學蔭宇寒生竊竊幸于登龍猥
蒙知于顧馬逖聆新渥快懌微悚莫遂隅趨徒虔厦賀

賀鄭侍郎移鎮平江府啟

伏審報政疇庸祇恩移鎮攀轅塞路惠大洽于朱方換
印班條榮遠踰于白傳異帝城之蒙福示朝廷之深知
詳試近州將加大用凡居庥履舉劇懽愉恭以某官學
探聖真望隆師表耆壽俊久在厥服為二朝之從臣直
方大不疑所行推一時之傑德屢分藩寄每上最書結
北固之去思臨中吳之舊治郡人相慶還依外相之恩
光童子來迎爭看細侯之風采深惟吏道貴得人和衆
方務草木之知名公獨與陰陽而合德所居民富易地

皆然簡在上心承天寵也既驟膺于褒策佇即對于賜
環入為三公永清四海浚久叨恩紀逖遠台儀企宴寢
之凝香莫遑布武仰置郵之傳命徒切欣心燕賀有誠
魚書靡既

賀樓樞密啟

伏審祇奉綸書寵還樞柄任舊人共政黎民職有利哉
頌聖主得賢天下喜樂之矣竊惟一人有慶四方無虞
雖時偃五兵不復折衝而決勝然武有七德蓋欲安民

而定功宜用碩臣進司密地恭以某官天付正氣時推
元儒得大學而三月不違乎仁能誠身而萬物皆備于
我勇于義果于德蓋自比孟軻以斯道覺斯民則有若
伊尹久更夷險曾靡磷緇外雖恂恂而寡言中實堂堂
而不撓往當晉擢正屬艱虞掌制北門揮翰應掣鈴之
召本兵西府運籌多借箸之奇衆方不知所為公獨沛
若無事旋將使指遠慰邊氓撫秦隴之荒殘致關河之
懷赴信是兼資于文武宜膺注意于安危繼丁私艱久

鬱公望肆及逕衡之日起分共理之符班宣暫倚于維
藩眷想彌勤于仄席謂陽城之賢為刺史美化纔覃于
一方使陸公之道行朝廷大惠可均于四海乃因移鎮
載見邃宸遂命留中寧容久外復付機廷之舊兼躋政
路之崇惟簡在既深將勤勞是賴必嘉謀入告于內則
膏澤益下于民同寅協恭和衷克左右厥辟禁暴戢
兵保大以救寧圖功鎮撫四方仁壽一世使戰陣之間
不至而道德之威自彊中國皆有安居左袵罔不咸賴

浚向風景慕積日滋多八行罕貢于微悰萬頃尚容于
廣度念遠跡它山之下正邈親承而見公此道之中未
嘗違邈茲仰對揚于大冊無遑進旅于下賓第慶治朝
載陞耆德夙夜基命宥密方觀佐理之勲疇咨若時登
庸佇正儀刑之位熙春清淑盛府靖深神其聽于正人
天必錫之純嘏願遵六氣加練四經仰承晝接之休下
副巖瞻之重系頌增懌敷宣莫殫

賀徐江州啟

起殿上府榮分左符成命誕頒羣情均愜恭以某官蘊
端凝之器負蹕越之才悃悞無華如古循吏疏通知遠
為時聞人累膺重寄于藩宣所至茂揚于名迹頻年均
佚輿論良淹簡在上心久著書屏之治狀眷茲外服聊
煩擁節以承流矧九江之名城控千里之勝勢實為重
寄允賴能臣注意有隆登崇可俟浚雅蒙知獎逖阻進
趨仰慶恩除徒深抃頌

代賀詹中丞啟

論事諫坡奏囊封而悟意持平憲府拜綸命以祇恩一
臺肅振于紀綱四海聳瞻于風采恭以某官德符帝賚
道覺民彝厚性寬中雖有容而敦大古心勁節自不撓
以端凝進逢華旦之紹開驟歷清途而融顯通班兩禁
冠列七人有嘉謀嘉猷若王魏之善諫皆正言正事非
堯舜則不陳忠實本于愛君志寧期于揚已純誠上達
眷注彌隆膺弄印之簡求已聞晉陟被覆甌之考慎行
慶登庸某久竊依歸最叨容接仰聆孚號載虔賀履之

私倚俟東成將有在釣之幸莫遑望拜徒劇欣愉

代賀張帥啟

伏審黑稍臨軍焯著束戎之伐朱弓錫命懋昭復土之
功三捷騰聞萬聲歡動某官威宣漠北望出山西攀附
龍鱗飛揚燕頤銀章粲煥執干謹衛于千廬玉節輝華
建纛榮蕙于四印屬遠人之射月紛戎馬之飲江直度
胥山橫窺禹穴帝震赫斯而授斧公當率止以乘騏借
箸前籌早揆請纓之策擬金徑進遂成喋血之勲力銳

拔山勢輕破竹黨衆四分而風走我師一鼓而鷹騰掃
遐服之塵氛拯人羣于沸鼎凱歌入覲寬九重北顧之
憂告語旁馳挾四海南奔之憤事曠前昔名高斯今某
濫竊蔭雲嘗叨披霧親仰一心之勝竝敢忘三賀之歡
言

代賀章察院啟

祇奉宸俞晉遷臺察大夫當敢言地會屬明時聖君用
不世臣茲為盛事贊書誕布歡頌交馳恭以某官夷粹

而剛方清明而博大多倫奇節凜秋霜崑王之姿秀世
高文挾陣馬風檣之氣厯揚臚仕茂著英聲進當開泰
之辰深被簡知之眷謂天子耳目其誰宜為顧朝廷羽
儀惟公懋德庸膺識拔光對寵休驟躋松廳增重栢府
昌言動寤豈特夜加于二階速達登崇佇即日起于九
級遂陞通列彌發賢猷某昔奉交承今欣擢拜撫小
冠而効職仰大厦以蒙庥肅政靖深芳春韶淑祈符人
望倍護天和

代上太守謝解啟

右某啟伏覩本州解榜叨與薦名者英遊甚盛俱推試
席之高流曲藝何為亦綴薦書之下列靜循忝冒深劇
兢慚竊以於赫皇家牧寧大業治功炳耀文物歲蕤酌
千古之豐規踵累朝之故實立太學教于國既形四方
之風論秀士升于鄉又下三歲之詔通經入選能賦分
科名藝無或不容得人于茲為盛矧鄉壤之繁庶藹儒
風之煇興遂序至列于山樊家書或充于棟宇珍羣屬

袂集廣園者幾四千人鑒裁提衡預遴擇者纔三十輩
宜有茂異來膺採收如某單微寒生苦窳陋器拾螢自
力數馬猶愚字僅識于一丁史寧明于三已磨丹漬墨
徒勤十紙之書對白抽黃未辨八吟之課何圖旅進濫
與計偕退省寅緣實為幸會茲蓋恭遇某官綜百氏之
學倡六經之文追古風流為時師表借從禁路殿是名
藩身蹈丘軻若在唐之韓愈士侔齊魯由化蜀之文翁開
納有容陶成無類致茲孱瑣亦被甄掄某敢不加鍊頑鉛著

鞭下馬儻遂策名之計誓殫酬德之私過此以還未知
所措

代謝李提刑薦舉啟

洗手奉公僅免曠瘼之責需頭剡奏過叨論薦之私褒
重一言價增十倍勒肌感著翻汗兢慚竊以人固未易
知譽或過其實顧偽者繁而真者寡豈不難哉惟視所
以而察所安斷可識矣彼浮躁銜露者寧享爵祿必者
龐福艾者可成功名心跡既呈人流自辨如某鈍姿不

穎朴學無庸偶綴下科漫從薄宦雖不能蠟言梔貌以
欺世而盜名然獨有鐵腸石心每誓身而秉志衆方嗤
點誰復知憐自忝一同曾無三異惟抱勤拳之意不忘
占著之民深絕吏姦懼有索錢之蠹敢傷農力寧甘腰
笏之勞初匪好修姑為率職詎謂大賢之容衆俯矜小
宰之無它賜以品題有存撫嚴明之目使之砥礪竭依
歸酬稱之誠荷戴無堪省循奚自茲蓋恭遇某官門承
鼎鉉材挺梁楹華國文高霄漢已觀于自致登車望重

巖廊佇副于人期博取羣才將資大用因令樗散亦被
甄收某敢不益勉駑行堅持株守自今以始孤蹤遂玷
于陶成不顧其生綿力庶殫于報効

代賀富樞密啟

伏審顯躋祕職光輔洪樞渙汗風馳驩聲雷動恭以某
官高華大閥赫烜英稱士推韋康之淵宏實偉世器帝
謂魏謩之謹切真名臣孫欵奏論于閣中執憲剛于轂
下丞任本兵之重方膺注意之隆然當強敵橫驕頻年

大入虔劉上國燬剝生人掠地覆軍詎伊攘却絕江並
海無或誰何邊閭未有奇勝之兵帷幄靡聞伐謀之論
九重北顧仰貽嘗膽之勤四海南奔悵切息肩之念正
須疏鑿力拯橫流有能竭忠節以贊皇猷于斯時也將
必剛主威而隆王室其在公乎內除飛揚跋扈之姦外
禦暴勃凌縱之敵竦戴上聖圖回中興正位鼎司勒勲
金冊某甫脫巾而筮仕嘗披霧以修容埏冶既開竊幸
三薰之大賜雲龍胥慶欣逢一遇之榮觀

代賀吳尚書知婺州啟

伏審祇奉渙綸起臨名鎮帝城不遠介藩同三輔之區
民俗相傳良守應百人之識仁聲先洽懽頌交騰恭惟
某官道極中庸器凝方重際興朝之開泰被睿主之簡
知華轍踐揚要途密勿迴翔遺補諫行而澤下于民坐
總銓衡吏潔而俗移于下旋聞均佚久鬱具瞻茲分綰
于左符實眷求于上意尚書居八座九重舊識于履聲
刺史為三公一節當膺于環賜姑惟詳試即倏遄歸某

冰氏寒生泥塗孤進名在山公之啟事心馳夫子之宮
墻包荒不遺事先生有年矣知恩所自當國士以報之
況同編列之民將被幘幪之賜其為幸會曷勝依歸部
曲傳呼遠仰驅車而夙駕道旁伏謁行看騎竹以前迎
三賀惟勤八行莫既

代賀羅尚書啟

伏審祗膺帝制晉長天官總司典選之三銓冠位佐王
之六職士心歸重人論僉諧恭以某官碩德元儒傑材

瓌望際開泰之休運驟踐厯于禁塗伏下抗言每獻可
而替否殿中執法不吐剛而茹柔為天子知為真宰器
曳革履而居八座暫煩藻鑒于九流調玉燭而陟三台
佇俟丹青于萬化某登門下客竊庇寒蹤涇渭殊流仰
平衡之惟允燕雀相賀欣大厦之有成頌詠惟勤文陳
曷既

代賀趙丞相畫像啟

伏審宸心眷注繪鼎鉉之英姿天語褒崇灑奎鉤之妙

畫恩隆當代事掩前聞朝野謹傳人民詠頌竊稽簡策
間紀明良西平刻圖象之文非時君肆筆馬令拜白書
之賜無宿德大勲必逢上聖之有為斯見元臣之被遇
恭惟某官佑時生甫同德暨湯先定成規盡闢異議決
驅戎之策登論道之司治格一隆力成再造長樂溫清
遂明王孝理之心海宇阜豐躋斯民仁壽之域公功渠
迪帝庸作歌畫煥麒麟章騰鸞鳳式贊股肱之美示嚴
體貌之尊列辟具瞻謂相君之形惟肖睿辭敦獎見王

者之制坦明郁郁乎其文哉皜皜不可尚矣實繫垂休
于萬世豈惟示寵于一時永鎮廟堂救寧區夏其猥叨
知遇久玷鈞陶銜戴恩私獲逢榮盛誦聖言之渾灝竊
仰昭回慕真相之威稜莫遑稱慶馳心欣快矯首瞻依

回許丞啟

光膺薦書移宰劇邑仰慶雲之結庇棲倚方深念愛木
之留思攀依曷既貽緘戒別感篆增情尚期布武以請
違少控搖心之系戀

代謝循資啟

叨膺多賞濫躡階資覲墨奚堪吹枯有自伏念某三羸
蹇質一割微才屈首受書本在諸生之下列折腰為米
猥從末吏之餘塵初不能突梯以詭隨故每遭圓枘而
難合雖迫號寒之念恥求得熱之方迺踈無庸厯落可
笑伊誰許與第見揶揄身伏沉泥幾十年而不調心知
如水雖萬折而靡迴不逢照膽之明曷吐揚眉之氣此
蓋某官轂推士類衡評人材大賢無所不容小善率皆

以錄顧如羈滯亦被播揚昧門間半面之私遽膺齒識
茂堂下一言之美輒辱鞭驅偶收薄效于鷄鳴例得小
伸于蠖屈士為知己者用愚請繼今以言益礪齒而堅
修慨捐驅而自誓小人願也國士報之

代賀許右丞啟

顯拜綸絲晉躋管轄仰仁人之在高位慶聖主之得賢
臣華戎聳觀朝野歡動恭以某官伊旦事業夔臯才猷
龍淵早振于聲華經筵雅推于韜蘊紫鸞意氣自許騰

超之姿峻峯文詞兼得中和之美三朝耆碩一節險夷
入拜青門論駁數間于可否進簪白筆按押不避于近
強簡在帝衷擢登宰貳天欲中興于唐室公實左右于
商王紐網杞輪可但庾宣之規制為霖作楫會觀傳說
之彌綸佇正鼎司式符巖望某叨膺獎鑒例入陶鈞大
厦有成敢忘燕雀之賀神龍垂護願同魚鼈之嬉

代謝太守薦舉啟

三歲備員曾茂割鷄之效二天竊廕更叨顧馬之私過

賜挈提曲加論薦省力繇而惕慄戴恩紀以銘銜竊考
舊聞昭垂前志惟善能舉其類于人何所不容擢犀角
固貴于精求蓄牛溲或聞于適用類多善誘初不遐遺
去古賈遥取人大異舉六者用其一耳勢或奪之拔十
而至失五焉鑒亦疎矣必既明而且哲又以公而滅私
乃能盡紆餘卓犖之才亦不棄寒素卑微之士如某者
窮鄉孤進曲學陋生徒懷肝膽之輪囷殊乏文詞之婉
軟麤官拓落末路哀遲審已行而審已才了無足算非

其義而非其道敢妄求知矧以駑姿猥當劇邑民風龐錯簿領沉迷凡黽勉于事為盡遵循于條教居多通事已蒙轡策之寬豈有微能復被品題之重惟魯實慚于誠慙迂愚何有于端方其秉心而奉公蓋本維藩之流化謂或堪于繁要將有意于生成忝幸惟深寅緣有自茲蓋恭遇某官挺生名世濟美相門為人物之依歸膺屏翰之分寄洞見長吏治迹不待循行樂成士子聲名每形餘論因令頑鄙曲被采收某敢不勉稱褒言益堅

拙守謹身率職用逃瘝曠之愆効節輸心誓竭糜捐之
報

代上太守啟

中構侍席嘗蒙一日之知銅墨効官將竊二天之庇靜
惟幸會深劇依歸敢貢起居併伸悃悃恭以某官清明
而剛大洞達而端凝氣塞天淵名高日月言語妙天下
根輿學之紛綸出入冠諸公凜英姿之奇傑輟從禁路
來殿名邦父母撫綏神明發擿姦吏掃蹤而落膽齊人

吐氣而伸眉豈惟草木之知名兼見袴襦之流惠維藩
偃息報政推優復借一年已被褒崇之寵使宅百揆信
觀考慎之除某卑鄙賤生哀遲孤進猥叨吏屬行奉教
條念方隨牒以前趨尚及賜環之未至天其或者俾將
有所遇焉公實收之則宜如何報也瞻黃堂而仰斗傾
丹府以搖旌梅暑在時麥涼戒序益祈頤衛即慶登崇
代邑宰醮太一青詞

臣聞道雖不宰妙功用以難名神則無方挺精誠而可

格輒傾微悃冒叩高靈伏念臣猥以庸才濫當劇邑屬
陽盈之愆候繫旱虐之踰時雖徧走于神祠靜無證効
蓋率由于秕政積有咎愆曾微禍罰之加身顧致枯災
之及物民將潔腹臣則何心是用祇袂淨場虔延真侶
齊明厯吉懇欵求哀恭聞太一之尊儼在天神之貴位
通帝紀象著極樞宣惟當行次照臨誕敷五福實亦主
風雨水旱上躡三階敢對霄穹嚴遵科範披洞經于藥
簡薦芳醑于瓊尊憑藉薰焚用上章而悔罪庶蒙開釋

即從欲以流恩伏願盼嚮冥通飄游紛集上真昭答列
聖哀矜悼平民之非辜拯多稼之將槁風霆震薄驅左
落之神靈膏澤滂沱蘇中田之焦卷霽陰彌積靈霽無
垠將期為三日之霖不特被一雷之地稽首重拜馳心

九關

香溪集卷二十

欽定四庫全書

香溪集卷二十一

宋 范浚 撰

傳

徐忠壯傳

漢忠臣翟義傳

蔡孝子傳

徐忠壯傳

徐徽言字彥猷衢之西安人少為諸生泛涉書傳負氣

豪舉有奇志大畧喜談功名事宣和末知石州尋權守
晉寧軍時金人大入圍攻太原支兵障嵐石及瀕河要
阨處絕我饋援察訪使張灝以徽言嘗統河西軍討夏
人為知名將因奏使率兵掎敵牽制太原之圍徽言提
選卒三千徑進一戰大克遂通嵐石以北朝廷奇其功
就命知晉寧兼嵐石路安撫使敵再入攻國都陝西制
置使范致虛糾合西諸侯兵赴難檄徽言鎮守河西會
詔分遣大臣割兩河地予敵以紓患同知樞密院事聶

昌出河東為兵刼脅割河西三州予夏人晉寧民大恐
曰棄麟府豐我將不得獨全柰何徽言曉告父老第毋
恐此行人失使指耳三州自河西地藉令割棄事出詔
意猶當中覆且建不可況无尺一書邪尋聞朝命自以
麟府豐及晉寧俱隸陝西徽言遂引兵復三州并取嵐
石等郡邑已而兩京繼覆河東河北名城劇鎮往往陷
沒徽言能固軍飭備敕甲蒐衆田並塞地儲具饒衍士
告無衣則潛兵夜絕河斫柵襲敵數得帛以濟又教戈

船卒乘羊渾脫亂流渡掩敵不做敵日虞見襲震悸不能軍乃增兵備克胡寨吳堡津用渠帥為九州都統結壘對晉寧以相持徽言出奇兵挑使戰擒之以歸敵衆大懼相謂曰必是人也為我患者于是以晉寧為憂建炎二年冬敵自蒲津濟入夏陽澄城趣延安綏德延安帥委守去綏德迎降敵行无累遂薄晉寧先是徽言移府州約折可求出師夾虜敵毋坐自困待禍至可求以敵質其子故與之通敵挾可求招徽言城下徽言視可

求為外舍親乃登陴以大義譙數之可求仰曰君于我
胡太无情徽言攝弓厲言曰爾于國家不有情我尚于
爾何情寧惟我无情此矢尤无情一發中之可求走因
出兵縱擊大敗敵遂斬羅索貝勒之子當是時河東環
境為敵區獨晉寧屹然孤墉橫當敵衝勢相百不亢而
徽言堅壁持久撫摩疲傷距禦外攻遣没人汭河嘯王
民埋伏山谷者幾萬衆浮筏西渡與敵鏖河上大小數
十戰戰輒俘殺過當晉寧地勝號天下險徽言廣外城

東壓河下塹不測譙堞雄固備械甚設命諸將畫隅分
守敵至則自致死力其處以勁兵往來為遊援敵進攻
數債負不得志圖之益急為堙繚城竿隍陣晉寧俗不
井飲寄汲于河敵驅降人載芟石湮壅股流城中水乏
絕資廩亦浸罄鎧仗亡弊人人惴憂知殞無日徽言能
得衆心奮枵餓殘夷之餘哀折槩斷刃矢死固守既久
無援自度不支取礮機篋格若凡守具悉火之曰無以
遺敵遣人挾液蜜書僥道走東南告其兄昌言曰徽言

孤國恩死矣兄其勉事聖君一夕內應者繫帛書飛竒
上陰約羅索啟外郭納敵兵徽言擁帳下士決命戰鬥
中幾百遇所格殺甚衆左右死傷亦畧盡退嬰牙城以
守敵攻不已衆蟻登徽言坐堂上慷慨語將士我天子
守土臣義不見蟻敵手因拔佩刀自擬左右號救持之
急不及到敵兵猥至得挾徽言去然尚憚其威不敢暴
羅索得徽言所親婢說徽言盍具冠韞見敵帥徽言叱
曰朝章覲君父禮以入穹廬可乎汝素厚我且華人士

類而仕于北朝不即愧死願以為榮欲詫我且為敵搖
吻作說客耶不亟去吾力猶能搏殺汝羅索就見徽言
語曰二帝北去爾其為誰守此徽言曰吾為建炎天子
守羅索曰我兵南矣中原事未可知何自苦為徽言怒
答曰吾恨不尸汝輩歸見天子將以死報太祖太宗地
下庸知其他羅索又出旁行偽制撼詠徽言曰能小屈
當使爾世帥延安舉關陝地併有之徽言益怒罵曰吾
荷國厚恩死正吾所此膝詎為敵屈耶爾此時當親刃

我不可使餘人見加羅索舉戟向之覲其懼伏徽言意
象自若披衽迎刃無小變敵衆知不可屈遂射殺之尼
堪聞徽言死怒羅索曰爾麕很何專殺義人以逞爾私
治其罪甚慘羅索亦自恨悔不已城圍凡五月徽言以
建炎二年二月二十三日死本道使者與宣撫使相次
以聞朝廷嗟悼贈晉州觀察使明年昌言具晉寧死事
本末上之天子加恩賜諡忠壯再贈彰化軍節度使河
西之人思徽言不忘家繪其象又廟祀之蘭谿范浚曰

徽言死封疆于祭法宜祀其得所以易名者以勸忠也
惟我國家受天命臣萬方聖聖繼承仁涵澤濡海內澹
然熙又怡逸垂二百載民革顛不目金革戎政垢玩將
駘弱不武士卒墮冗耄贖備數伍符戈甲鹽蠹城障夷
隄一旦外侮間釁發兵南下鼓行長駟所向降陷大都
小邑督帥偏裨捐城跳身望旗奔遁或除館具炊以遲
寇至苟幸脫死不畏不愧不可指數有如忘身殉國伏
節不撓蓋千萬僅得一二可者焉至若忠規義槩魁壘

奇傑殆未有如徽言比者方徽言力保晉寧蓋患敵鷄跼
褻旬日夜腐心疾首欲疽其脅腋而潰亡之及勢蹙力窮
猶自厲作氣齟齬視敵雖見執耿介不少哀彼非不知一
屈首可偷活且得大利而勁節挺挺之死不變其所存豈偶
然哉予聞徽言與劉光世束髮雅故光世為廊延總管被
命援太原次吳堡津輒頓不進徽言移書趣行未聽又喻
以太原危不守旦暮望救總管奉詔赴急不宜稽固取方
命罪光世猶前却徽言即露章劾其逗撓封副予之光世

惶遽引道又河東人不忍敵侵虐甚愁惋吟嘯企而望官軍
覬得合擊敵徽言使人潛結汾晉間土豪有能鳩兵收故
地即表功隨所復郡邑世襲守長使還得首領千百人衆四
十餘萬條其事以聞俟報可即欲身率精甲擣太原徑取
鴈門留兵戍守部聚所結土豪并力圖敵且曰定全晉則
形勝為我有中原當指期平投機一時會不可失奏上會詔
徽言聽鄜延王庶節制議既格沮兵不復出嗟乎守晉寧
而急太原又將取全晉以規復中夏此其意豈特欲引歲月

死孤壘以為名哉而卒賁志以歿義士所為悼歎者也
初光祿卿范寅數陷敵中後自拔由河東以歸上書行
在述敵曲折且言敵人稱南朝善戰能堅守惟晉寧徐
徽言陝州李彥先二人道中見汾晉人被驅至晉寧攻
城折北創傷歸者係踵也又盛稱徽言數蹀血窘敵縛
九州都統殺羅索貝勒子敵方益甲恃粟期必拔晉寧
晉寧勢孤貼不可支朝廷乃遣使撫喻河西諸郡因詔
徽言率所部詣行在使者間關行累月始達廊延而晉

寧城陷徽言歿久矣嗚呼惜哉

漢忠臣翟義傳

漢忠臣曰翟義字文仲永始丞相方進少子以父任為郎稍遷諸曹年二十出為南陽都尉宛令劉立與曲陽侯為婚又素名州縣輕義年少義行太守事行縣至宛時丞相史在宛傳舍立載肴酒過謁丞相史飲未竟而義亦至外吏白立立語自如義內謁徑入立迺下走義既還大怒案立主守盜十金賊殺不辜縛送鄧獄掾

夏恢以宛大縣恐見篡奪白義可因隨後行縣送鄧義
曰欲令都尉自送則如勿收邪載環宛市乃送吏民不
敢動威震南陽後為弘農太守遷河內太守青州牧所
居著名有父風烈而勁正實過之徙為東郡太守數歲
平帝崩王莽居攝義心惡之乃謂姪子上蔡陳豐曰莽
今攝天子位號令天下故擇宗室幼稚者以為孺子依
託周公輔成王之義且以觀望必代漢家其漸可見方
今宗室衰弱外無彊藩天下傾首服從莫能亢扞國難

吾幸得備宰相子身守大郡父子受漢厚恩義當為國討賊以安社稷欲舉兵西誅不當攝者選宗室子孫輔而立之設令時命不成死國埋名猶可以不慚于先帝今欲發之乃肯從我乎豐年十八勇壯許諾義遂與東郡都尉劉宇嚴鄉侯劉信信弟武平侯璜等結謀舉兵立信為天子義自號大司馬大將軍移檄郡國言莽鴆殺孝平皇帝矯攝尊號今天子已立共行天罰郡國皆震北至山陽衆十餘萬莽聞之大懼迺遣孫建王邑等

與義會戰義敗見殺嗚呼莽之亂漢酷矣弑君竊國罪
貫浮于田閭漢廷羣臣曾無一以忠憤聞者劉歆劉宏
皆宗室至為莽國師將軍義兵之西歆反為莽屯宛宏
反為莽將兵劉氏若此他姓臣復何望哉莽始聞義起
師會漢羣臣宣言周公攝政管蔡挾祿父畔周事以義
挾劉信比之漢羣臣皆云不遭此變不章聖德其佞媚
乃爾又宜復有以忠憤興者乎于斯時也獨一翟文仲
能憑區區東郡建倡大義欲戴漢宗為國誅逆功雖不

遂其意象為如何抑又聞義兵初興三輔人霍鴻輩並起應義謀攻長安衆至十餘萬亦不可謂無人助也莽方惶懼至不能食日夜抱孺子告禱高廟放大誥作策班行天下諭當反政孺子意使義此時得一戰勝則戮元兇如摧枯復明辟如反手功必成矣不幸至于遽敗猶宜錄其忠義大節標表而旌明之班氏作史既不為義特書而附見于方進傳後又譏義不量力以隕其宗春秋褒貶之旨固如是乎義言死國埋名猶可以不慚

于先帝情辭慷慨固以隕宗殉國自期矣不量力而死孰與事漢賊而生乎固之評于是為大失因補其遺作漢忠臣翟義傳

蔡孝子傳

蔡定字元應越之會稽人家世微貧父革依郡獄吏傭書以生力使定學身勞苦資之以故定處黌校稍稍有稱郡獄吏一日坐舞文法被繫革以註誤例在効中革年七十餘矣法當免繫鞫胥任澤削其籍年而入之

罪罪且與獄吏等案具府奏上之方待命于朝故俱久
囚而革不得獨決定竊痛念父當耆年以非辜墮圖狴
誓將身贖數詣府號訴請代坐獄弗許請効命于戎行
弗許請隸伍符為兵又弗許定知父終不可贖也仰而
呼曰天乎將使定坐視父纏徽纆乎父耄耄不應連繫
傭書罪不應與獄吏等理明矣而無所云訴父老而刑
定之生其何益乎定圖死矣庶有司哀憐幸而釋父則
雖委身重泉于登天為不殊于是預自誌銘其墓又為

狀若詣府者結置袂間皆叙陳致死之由冀其父之必免也以建炎元年十二月二十九日自沒河死府帥聞之驚曰真孝子也立命出革厚為定具棺斂事而撫賙其家蘭溪范浚曰嗚呼大孝吾不得而見也孝若定者亦今世之所鮮聞也世之人視親若視其妻子之心切焉者無也彼惟庸愛在妻子而斯須之愛在親親有勞苦不肯一勤其手足代之其肯殺身以出父于囚牢中乎今之為人子者有觴酒豆肉持羞其親則已色然自

得謂為難能之孝況若定之捐軀活父其為孝又可究乎予得定所為誌銘與狀感其言情哀至至為泣下念定孝若是是宜見旌于時而事不上聞定將無以自見故為定作傳異他日萬一獲私于良史氏

香溪集卷二十一

欽定四庫全書

香溪集卷二十二

宋 范浚 撰

墓誌

高府君墓誌銘

安人胡氏墓誌銘

吳子琳墓誌銘

夫人章氏合祔誌

張府君墓誌銘

右朝請郎致仕范公墓誌銘

代

祭文

祭姪端受文

高府君墓誌銘

右修職郎高府君諱廉字清臣年七十卧病卒于家既問
龜以窆得日其子梅書來請銘于香溪范浚者三義不得
辭蓋梅與予同鄉邑娶予外兄江處州之女又從予學久
故獨求銘于予且其書辭曰梅之積罪不殞泯而俾先人

無祿梅將何聊以生惟終事之未哀姑綴餘息敢告寔期
祈深哀之尚得銘以昭諸幽則其垂無止豈惟不肖之孤
賴之將先人實安于藏蔑遺恨矣梅惟哀慕其親至無已
也而拳拳于得銘是亦稱親之孝固予他日所以教夫學
子者銘其可辭又梅族兄弼狀府君行實以來屬宗弼里
中父儒篤厚無華非貌言者予因撫其事書之按府君娶
之蘭溪人曾祖之勝祖全父逢世以貲豪于邑至府君始
為諸生試有司既數不利父諭之曰凡人仕進非一軌能

佐國用如漢卜式不亦可乎府君聽令補太廟齋郎調授
右迪功郎主信州弋陽縣簿將赴丁父憂既即吉浙部使
者以府君有更才擢攝台州臨海尉歷五月代歸又辟杭
州昌化尉未行會青溪劇賊張甚陷旁郡邑府君慨然曰
先人固命我如漢卜式式知憂邊吾顧不能衛鄉壤是死
吾父而棄誨言吾不克子矣于是募拳勇合里衆揚兵固
壘為武守盜不敢犯王師復娶府君以功當超進五階適
兄之仇與在賞中府君泣言曰吾恨不傳及其人使吾兄

釋憾地下胡顏與共冒榮乎遂不受賞其後防遏使錄府君他功奏遷右修職郎于時或勸之從仕府君太息曰吾母抱病日益劇吾方侍牀下不可一刻輒去尚何仕母尋不起府君終亦不仕蓋府君資孝謹自髫幼時大父喪明能扶持不倦長而執子職不遺力親有疾奉藥奉膳必躬夜不解衣雖久彌虔再遭閔凶藥棘毀瘁當二兄議析產府君推肥美地取荒頓堯堉者兄歿庀葬具如禮資其孤使妻娶又好施予凡道路之絕若親故叩門率賙之不斷

歲荒作糜餼以活餓人或倒廩賑貸有逋租負錢多折券
不責償鄉人稱之暮年優游家居飾園宇日與客銜觴高
會曠懷取適不以利害得失經意惟篤于訓子作齋館架
羣書其間厚禮致文儒于師席方便桺從子游身送之子
家懇懇謂予桺也材下宜擯不教幸而辱收之其將何學
惟所命第覲桺或知行身之萬一耳世有挾藝射科速化
之術非所敢望夫桺也觀府君責桺之意可謂知本矣而
桺亦能持身務學姁姁謹順為克家者蓋嘗論世人號善

治生往往豪暴漁奪以財力役使小弱雖壤長貲積而為
後人怨府亦益深矣惟府君修先業而息之未嘗爭利顧
獨行惠赴人艱急使閭里樂其和厚又知以義誨梅則所
以遺厥後者與時俗固殊可尚也已府君卒以紹興十有
七年春三月丁卯寔以十有八年秋九月己酉娶舒氏先
府君九年卒墓在縣之甘棠鄉仁壽原府君所合葬也有
男女四人男長曰才之早天次即梅女長適進士徐毅次
適右迪功郎江輶孫女二人銘曰

盡力于親行惠于人其厚也性茲惟基之後人承之尚嗣其慶

安人胡氏墓誌銘

安人胡氏左朝奉郎知處州江公諱惇提之妻奉議郎致仕贈朝散大夫諱衍之介婦世家嚴之壽昌大父楚材為真州判官以介直爭事觸部使者怒拂衣徑歸父彛提筆試有司不偶取夏課裂去著居士服立義于州閭尚氣豪舉代有令德是生安人節行純備方髫稚時

淑靜儼雅不習游弄不為矯笑戲言外祖太府少卿范公錡奇之顧謂居士君而女婉懿有殊姿宜以室良士吾外孫惇禔江氏之秀器度甚偉行礪而文而女捨是將孰與居士曰唯敢不惟公之從卒以女于江時發之蘭溪言令姓者推江范而胡亦嚴名宗三家族屬各千指舉稱安人賢入門贊見舅姑上下交賀祇率婦事久益起孝侍疾不脫帶喪之羸毀類如其夫時節享嘗薦藻納豆必躬視惟謹承內外尊已者與處敵以下至遇

勝侍率中度有宜稱處州使君歷官久所向號治蠲瘼
蘇枯民以永懷安人實左右警益助為寬大宣和初山
賊來自婺源攻陷蘭溪殺官吏以逞窮索不置有逼使
君行者使君方丁大夫公憂累然簷線顧慕靈几伏哭
不能興安人攬涕開慰君第無虞日君令婺源子其人
有留惠彼雖暴桀非有鳥獸心忍忘恩紀加所天邪既
而如言果不害後使君攝衢州江山丞適叛將苗傅兵
潰涉邑境急王師追之急他官怵迫不知計宜皆輕遁

使君謂義當堅守供億我師去則乏軍興雖即誅何補
安人亦激烈贊勸君抱責于此效死固其所無以我輩
為私憂將與君俱死使君卒不去人以為忠蓋安人識
通悟動見事會于使君克有相云性儉素不隨俗為誇
華塗澤笄珥襦襦無采翠襌飾一敝衣雖屢紉濯猶服
之不棄蠶織每身其勞子或諫止則曰是固婦人事非
利之也爾儒家子耕稼勤艱慙不及知我自力為此聊
亦警而輩耳因命冢婦稚婦汝有婦職其可一日不虔

始吾歸爾舅奉沃盥拜堂下威姑訓以先世勤約之規
吾日銘于心今用以誨汝豈惟汝所宜守當奉之為世
世戒也使君既沒遂屬其子無以家事關我旦旦取天
竺書誦諷沉研不忍翦生物間却葷血為伊蒲塞食恬
默無營若自得者平居未嘗遇病髮秀益康瞻聽瞭聰
由其居心和易致之宜以永年忽得微疾遂不起聞者
咨悼實紹興十有九年正月壬辰也年七十有三生子
三人男曰鞞右迪功郎前處州瑞金縣西尉曰鞞舉進

士嘗謹謹自持女適進士高梅孫六人咸幼其一男也
安人之垂終告軼等吾自視危愒息且不屬幸及爾壯
長嗣業爾家惟飭已在不怠庶永有就爾克用我戒則
我為不死我亦念爾父官進勤劇將身不緇越既棄爾
藐孤吾周視篋衍魯銖縷之不蓄吾惟攻苦以育爾克
至于今彌無餘資死能葬我稱家率禮俾人無爾非者
是爾為克藏我終事吾見爾父地下靡有憾矣二子遵
之使來香溪告少卿之孫浚曰吾母將以十有一月甲

申遂安祔于縣之龜坑西原先君之墓敢請銘浚惟我
妣榮國夫人謂居士君實伯兄合中表言之浚謂處州
外兄謂安人外女兄安人且謂浚外弟銘安人莫如浚
宜謹諾為銘曰

芳徽淑行世軌儀女婦姑母茲其規我撮懿跡聲于詩
珍珉其藏告無期

吳子琳墓誌銘

君吳姓諱珪字子琳婺之金華人曾祖藻祖善父權世

隱約君幼謹順壯滋有立父知可倚俾卜別墅理家事君亦念世業汨振惕焉遵命度地得靈岳林泉之勝結廬以居為裕蠡計常鄙世俗嗜利子沓貪無藝以子貸豪取牟息倍稱我則不為第務以信實得人和賑憫單窮率本業之不立券牘或負約將剔田帖屋以償則笑謝曰以逋負利人田廬豈吾心哉卒棄責弗取凡其意氣濶達類此越四十年儲義甚富而日積月衍資亦高矣會睦之劇賊充斥不制四掠比郡嫠浸為盜區君

徙家集族壁險自固距所居十里餘日營支計費恃無
仇怨常出歸自如間逢堯衆方屠剔人皆擲刃歛衽疾
言開慰我不敢暴其無恐他盜過者亦相戒無窺吳氏
每望屋引去兄子曷家烏孝盡室前已歸君久之曷方
挺身來自間道為惡少遮止問為誰將安往曷對以實
惡少愧謝炊黍供待護送歸之君時姻舊逃亂相依倚
凡數十族經給資用藥物均惠有終始鄰曲附賊者持
米肉來餉君因以禍福鐫曉其人盡即效順無久迷繆

為此不祥徒以身膏官軍銳鋒衆感悟釋柴械而還民
伍者十九逮賊平向藉君全濟者多負不知報人謂自
是有以緩急告君當戒門以絕矣後成臯挾潰卒攻婺
郊郭草擾依君者愈衆君益開納厚相勞苦必于我乎
館意顧倍蓰于昔人始咨歎以為難及君性和裕于臯
弟友睦方議別籍悉所有均析不名其私一銖于遊從
未嘗以貴勝寒品生輕重心于細人務為并容謾欺玩
靳一不之詰至或挾豪佩勢臨之則毅然不受里中人

推為長者皆慕賴或他適往往丁老叢集候門若待哺
然有鬪諍君一言曲直各厭悅解去蓋其平居立然諾
故素信喻乎人如此紹興十有八年六月己未以疾卒
年七十有三娶郭氏生男三人曰昶曰昂曰晟女五人
長適進士邵汝能次適進士何溟次適左奉議郎湖州
州學教授唐堯封次適右迪功郎宜州河池縣主簿俞
允恭次適進士何洌孫男八人曰三錫三益三畏三省
三思三復三俊三英孫女六人長許嫁唐仲義餘在幼

君雅知慕善開館貯書延良師碩友使子姓稟學故昶
等皆競爽尅厲昂以藝業登名于薦書士友稱之君方
疾劇顧昶等與諸孫戒曰始吾至靈岳未有溫飽計今
服食兩餘非智得也有命焉若等當益殖學無務殖貨
力行勤儉謙厚四者如吾平生示訓足天言既奄然以
暝嗟夫今人愛子男遺之積者恨不百鉅萬失學無教
或不能記姓名女嫁之甲門右族無復擇對多與凡子
君獨能以詩書儒其子孫將終之言猶婉勉以義其得

壻又皆郡邑彥士可謂知所以愛子矣二十年正月丙午葬于縣之東溪古寺山之原前期昶使謁銘于香溪范浚昂且來屬浚顧同鄉壤又得君行實狀稽所聞為信或益以狀之遺事諉浚曰是宜傳載因知君為人稱思沒且不忘銘其可辭銘曰

人當畏塗身窘不容君逢艱危克亢厥宗惠于鄉州長者之風恩或我孤我益有終儒其子孫慶則自躬有銘幽墟刻示不窮

右通直郎范公夫人章氏合祔誌

夫人章氏開封人故將仕郎諱發之孫贈朝奉大夫諱
志孟之女章氏世為右姓大夫寬然長者喜以義紓人
急方吾祖少卿舉進士客京師大夫相與厚甚吾祖仕
既位于朝念大夫雅素不忘而大夫愛夫人亦欲以
與范氏吾祖顧我叔父曰爾宮其納弊以為爾相故夫
人歸于我章范用益親其後大夫之子震官陳留遇兵
以忠死三子負其母奔俱來南依夫人夫人除奧室處

之供待積年滋有恩意人皆賢夫人成吾祖念舊之志
克有終也夫人明悟靖莊承宗事謹奉舅姑孝御下惠
而嚴凡佐我叔父率順且有助性素約縮衣嗇食資用
無侈長我叔父捐館舍夫人卻家事聽其子日清心翫
西佛書嗜善喜施濟涉以梁灼起病以藥石卹死以葬
埋具有孤寡不能嫁者為辦裝擇對使有行姻戚鄰曲
多蒙其惠年七十有一得積寒疾卧累日日劇不哀以
紹興十有五年冬十有一月癸卯卒于家遂以十有二

月已酉葬自我叔父墓于勝觀原二十有四年矣于是
以夫人治命更卜兆于塋東十步所用遷寔我叔父越
三日夫人合祔焉夫人生男五人長曰淇故任右承直
郎衢州開化縣令次曰注三與鄉貢次曰汲學該涉有
志氣次曰滂開化令及仲叔季皆先夫人卒其幼曰津
女二人長適右丞議郎通判洪州徐端禮次早卒孫男
九人炳煜煒焯輝光炤燾烜津與諸孫皆力學問煜嘗
在國子薦籍中孫女十有二人長適右承直郎張文之

次適右承直郎章著次適進士蔡九齡次適右迪功郎
晏節餘髫孺曾孫四人坦塤塹曾孫女五人夫人之
祔既有日津以埋辭屬其從兄浚浚曰叔妣夫人先世
令族父克義兄克忠夫人之賢也固宜賢而有傳以示
後亦宜也顧雖文字蕪鄙其何敢不力惟我叔父世系
爵里與行事自有誌今即蓋石書夫人懿行卒葬月日
琢之歸諸墓

張府君墓誌銘

諸暨張龜年卜葬其考府君前事之月以行狀走書謁
銘于高平范浚曰龜年無似日獲擁篲墻屏下竊自比
數于諸生敢告不弔惟身負釁逆上禍慈考欲養之志
終天莫伸顧方當門庀事不敢即死寔有日矣僥幸而
賜之銘使有以告于寔窆是大憫其孤藐而顧覆之先
人有知將不憾于地下書至浚一再閱為之悵然如見
龜年稽顙觸地而聲其哀也初龜年來蘭溪從子學府
君以書先之問可不可辭連累數牘又以予所厚書來

言既又以書道謝懇懇逮龜年踵門禮恭而辭順授之
學服習不懈中易直無歧徑同舍生舉稱之因知府君
力于誨子非一日積又使之越境來學此其意亦已篤
矣今世積居潤屋者所不足非財也而方命其子若孫
倚市門坐賈區頻取仰拾爭錐刀之末以滋貯儲有讀
一紙書則奪取藏去或擘裂以供覆瓿怒而曰吾將使
金挂斗牛馬以谷計何物癡兒敗我家戶事顧欲作忍
饑面翻故紙邪用是大家子多些寐不勤卒或無以自

業故予于府君謂知以義方字厥子是異乎末俗者也
今得其行事狀益見逆知府君果不妄矧龜年以嘗請
業故來祈銘而叩叩之悲將得辭乎按府君諱緒字端
遠紹興府諸暨人自髫年知勉于學其父居邑屋以氣
槩唯諾聞賓禮善士使子姓從之遊故府君益習業當
宣和初有籍在州校會盜發青溪亂挺越部府君鳩族
屬聚落合力保壁衆悉附服貧丁輕猾無敢去為椎剽
鄉境賴安而貲侍用無遺餘矣繼丁大故生業益落府

君得計然心筭以治產累歲遂至饒衍然奉身菲約知
推分自安有薦之戚里要人奏補承信郎初非其志不
求官進乃樊圃沼泉為游亭問館蒔雜花美木置酒流
覽以娛客士夫過之嘉其好事自喜平居賙救鄰曲多
趨人急或窶且病遺之珍藥不以貴靳歲計食粟斥羨
積平糶之有所稱貸率薄其贏里中子錢家因相視為
率不得多責息嘗大雨雪寒玄積白府君登樓憑眺有
至脯西無炊煙者慨然發困分贍所全活甚衆大抵設

心本夫慕善故近厚如此府君以紹興十有五年夏六月丁酉卒以明年冬十月甲辰葬于縣之槩浦鄉梅塔原年五十有二曾祖參祖湜父譽皆不仕娶蔣氏生男二人龜年其長也次曰椿年孫男三人孫女一人銘曰勤以厚其生又知義方惟圖之良後之人勿忘卜兮食西原之岡坎厥中而藏其安無傷

右朝請郎致仕范公墓誌銘代

紹興五年夏六月癸亥右朝請郎高平范公卒以冬十

一月乙酉葬于婺之蘭溪縣北觀後山前事其子使來
乞銘于祕書少監潘良貴曰端疑不天先人倅鄱陽以
疾請老繼卽世諸孤念安厝之重姑忍死銜哀奉喪歸
卜窆事既得日矣圖所以銘埋石為不朽者敢以勤執
事良貴于公同鄉壤且有好舊銘其可辭按公諱溶字
茂寬世為蘭溪人始以祖任補郊社齋郎調授將仕郎
開德府司理叅軍歷洪州左司理維州士曹左推獄知
歷陽武康二縣權通判饒州官凡九遷至朝請郎章服

銀緋公練熟吏事于決獄尤詳明三為州刑官再治邑
皆以平恕稱在澶淵囚有毆婦人傷甚者墨曹以破骨
限辜既四十九日而婦人死公曰法破骨限日以五十
而創傷辜不踰月今四十九日矣脫不破骨得無冤乎
生固不容剔肌以辨其人死且腐骨可驗也驗之實止
創傷遂以逾月論囚得不死其平反類如是治歷陽有
惠政適淮東西歲大侵米騰貴甚所至發廩舉荒政多
乏事獨公處畫有條畧饑羸流冗赴如得歸全活數萬

計朝廷遣訪使察兩道賑濟首薦公能時郡將喜彛佞
且悍刻遇吏屬如束濕一語不合輒文致以罪曹掾輩
阿合趨和猶惕息不自安公日以職事造請恥苟為隨
順常引義固爭將不悅因窘公徧捕邑胥史械繫笞楚
推詰百緒迄無纖介事及公者公久移病卧不出吹毛
洗垢一聽之既移日將愧無如公何則使人諷公謝已
當置獄公不屑曰我誠有罪謝不可誠不有罪可無謝
吾方投幘須劾去將非吾所任事也遂不謝而獄無所

歸亦尋寢有盜羣輩攸攘橫不制公出竒畧縛取之鞠
司薄其罪以害公賞公曰是吾心也以職取盜盜釋弗
誅責塞而人無殘何賞如之不復辨至武康訪邑父老
以疾苦咸訴前令裁定物力溢故數錢千者十餘萬科
歛遂煩而輸不前公欲更之吏白版已上郡須三歲可
改定公曰是且困吾民一日不可可三年乎立告喻父
老槩除十之二繼列其弊白郡追易前版人以為利而
不私錢塘亂卒嬰城以自固距邑不三舍聲欲樵境上

民悉荷擔公列夫屯扼走集固圍飭備候邏嚴密闔境恃以無恐方諸道會合之師烏合環賊不用命戰未接輒潰去所過因暴抄有犯邑者乘暮夜斫柵譟而入公率衆逆之曉謂曰爾討賊者而欲為賊乎王師行即至毋自取絕頸禍且爾假道不過圖一夕安苟捨仗不吾擾將館爾于市糧扉芟秆惟爾之須不然吾衆銳不可怒也其人皆聳聽警愧合言曰惟公命則褫甲束刃入就館無敢輕出與市人交語者不信宿徑去以故武康

獨無剽掠患及將代邑人安公政再詣行朝借留鄱陽
號劇繁公以鎮靜佐邦治雖軍書饋檄委沓無間日每
支計得宜能不擾以及事會歲旱官平糶以資餓人公
適攝守命吏毋限郊郭隨至畢給又倍稟之率人日得
二日食眠他州流惠為多既而旱愈虐公以為憂徧走
羣祠禱雨甚力因得疾竟以不起人哀之公自早歲懇
懇嗜讀書入官猶不廢間提筆遊舉子場兩與賓貢補
太學內舍雖不第而學彌篤該涉經史綴文裁詩語皆

溫粹有典則性宏厚孝友于兄弟族黨交遊無不善立
義甚高喜趨人急北海工曹元億當改京秩而薦章危
及格且代去去則章不可得公以已所得章推與之人
稱為難生平恬介未嘗趨競仕雖累歷而清苦自刻勵
又好施與卒而家罄乏無餘貲享年五十有四曾大父
中孚故贈左正議大夫大父鐸故任左朝議大夫父筠
故任左承議郎累贈左金紫光祿大夫母安定胡氏贈
同安郡夫人娶今右朝散大夫廬陵歐陽中之女先公


十四年卒贈安人生女一人適今右承議郎林元忠男
四人惠州文學端疑其長也次端丞端輔端弼俱力學
問孫女一人孫男三人曰武仲文仲牧仲俱在幼公之
歿凡知識大夫士若州邑朋舊至田里細人無不歎悼
有泣者銘曰

何中之平不谷不陵而不長厥齡何仕之能又惠
且清而不公不卿惟蓄德之羸為嗣人之承其徵斯
銘

祭姪端受文

惟年月日叔浚等以清酌庶羞之奠祭于物故四十五
姪之靈嗚呼惟我伯父與先兄沈光匿彩再世不大爾
能克紹前人積銖累寸訖于有成女得所歸男知學問
辛勤以有屋廬則爾之料理家生豈不艱哉以常人視
之宜食息不暇而爾能外交士大夫內睦宗族至閭里
姻舊承上以欽撫下以仁各得其心有緩急叩門惟力
是視無毫髮靳色則爾之才可知矣余與諸父子姪展

維桑之欽歲時節臘弔函賀福舟車馬跡經于邑下無
問晨夜館于爾穀于爾者凡幾年意有初終亦難能也
謂天假之年享為善之慶而一病不起子方從學不克
俟其有成豈報于身者如是之淺少而貽其厚于子孫
乎我與諸父宗人尚能撫爾之孤以遂爾之志今爾寔
得日率香溪之族祖奠道周爾其有知庶幾來鑒尚饗



香溪集卷二十二

香溪先生文集後序

予朱子集註孟子全載范浚心箴由是天下莫不聞其名且與天壤俱敝也浚字茂明婺之蘭江人因其里居稱香溪先生祠于學宮舊矣師道幼即訪其文集不可得嘗讀默成潘公與范賢良書而知其交讀徐忠壯徽言傳而知其所取又得前輩誦傳姑蘓臺賦雜興諸詩滋欲見其餘而仁山金氏四書考證謂范集近亡以金之洽聞而云然殆無有矣居其鄉思其人而不誦其詩

而讀其書不能不致予恨焉至順辛未始得先生文七
卷于親友應氏家蓋其首編也陳公巖肖序稱從子端
臣右史所纂凡二十二卷則逸者尚多一日先生族孫
俊來言家藏缺自一至五卷惜其無從補也于是忻然
畀之足以成編烏乎百年之闕一朝而顯兩家之藏不
期而合抑亦有數存其間耶先生當紹興中舉賢良方
正以秦檜當國不起大節偉矣其學多本于經貫穿精
覈諸文皆蘄絕矯健鑿鑿明整卓然名家鄉先正有槩

蓋自先生始也古之賢者嘗患無子孫之傳而有子孫者每患其不知學近時范氏之族豈乏富貴者恨其不能為先生置祠奉嘗至于斯集之傳又不過當時一餉費耳浮榮悖貨倏焉漸盡而不亡者固自若亦足以自傲矣今右史裔孫元璫念殘集之復完懇泯沒之薦至首刊數卷將率其族人之力而終之不私其美又以右史蒙齋集未及刊則以其與香溪唱酬諸詩先附見焉俾予序其事予于是編固願有述又嘉元璫之能光昭

其先庶幾賢子孫已凡與于此者豈不與有榮乎年月
日後學里生吳師道序

題重刊香溪先生文集後

進士唐君尚虞之治蘭溪也用儒飾吏善于其職克協
上下聲稱翕然乃于涖政之餘閱地志訪遺書禮鄉賢
將以興廢舉墜隆化美俗于是香溪先生范公之後曰
永昌者出其家藏之集二十有二卷蓋先生從子右史
蒙齋之所類也唐君讀而歎曰先生之文世知誦習者
心箴而已他蓋罕有知者今觀其言如以恥為入道之
端以古之聖賢未有不由悔而成又謂學者覺也心且

不存何覺之有皆超然自得于學者極有警發不獨心
箴為可取也故朱子有不知從誰學之語而先輩謂其
得于孟子者為多若先生者豈非所謂豪傑之士哉幸
此集尚存惡可使之泯沒而弗傳耶爰命鋟梓以惠學
者而俾懋識諸其末竊惟先生之學之文與其立身大
節故侍郎陳公巖肖禮部吳公正傳序之詳矣懋生也
晚弗獲接聞前輩餘論于先生所造未能窺其萬一尚
何敢贊一辭哉獨念吾鄉聖賢之學前此未之聞也而

濬其原者自先生始繼而後有東萊兄弟麗澤之講授
又其後何王金許遂相繼以得考亭之統道學之傳于
是為盛非先生之功而誰功今當道學不傳之餘而唐
君復以先生之文倡焉其所望于吾黨之士者不淺豈
天意又欲大昌斯道之傳也耶不然何其闕于前而顯
于今耶誦其詩讀其書而遐想其人于數百年之上能
無奮然而興起者耶此懋于唐君是集之刻所以重有
感云屠維大淵獻之歲季秋九日里後學章懋拜手謹

題